

宋

史

十

蘇子瞻
解學
PDF

本紀卷第三十六

宋史三十六

開府儀同三司柱國錄國重事司書丞丞相修國史領經筵事兼總樞密院事

勅修

光宗

光宗循道憲仁明功茂德溫文順武聖哲慈孝皇帝
諱惇孝宗第三子也母曰成穆皇后郭氏紹興十七
年九月乙丑生于藩邸二十年賜今名授右監門衛
率府副率轉榮州刺史孝宗即位拜鎮洮軍節度使
開府儀同三司封恭王及莊文太子薨孝宗以帝英
武類已欲立爲太子而以其非次遲之乾道六年七

月太史奏木火合宿主冊太子當有赦是時虞允文相因請蚤建儲貳孝宗曰朕久有此意事亦素定但恐儲位既正人性易驕即自縱逸不勤於學浸有失德朕所以未建者更欲其練歷庶務通知古今庶無後悔爾七年正月丙子朔孝宗上兩宮尊號冊寶禮成丞相允文復以請孝宗曰朕既立太子即令親王出鎮外藩卿宜討論前代典禮允文尋以聞二月癸丑乃立帝爲皇太子慶王愷爲雄武保寧軍節度使判寧國府進封魏王三月丁酉受皇太子冊四月甲子命判臨安府尋領尹事帝之爲恭王與講官商較

前代時出意表講官自以爲不及逮尹臨安究心民
政周知情僞孝宗數稱之且語丞相趙雄曰太子資
質甚美每遣人來問安朕必戒以留意問學淳熙十
四年十月乙亥高宗崩十一月己亥百官大祥畢孝
宗手詔皇太子可令參決庶務以內東門司爲議事
堂十五年二月戊戌帝始赴議事堂自是間日與輔
臣公裳繫鞋相見內外除擢自館職部刺史以上乃
以聞九月乙巳又詔每遇朝殿令皇太子侍立十一
月丞相周必大乞去孝宗諭曰朕比年病倦欲傳位
太子卿須以留會陳康伯家以紹興傳位御劄來上

十二月壬申孝宗遣中使密持賜必大因令討論典禮既又密以禪意諭參知政事留正十六年正月辛亥兩府奏事孝宗諭以倦勤欲禪位皇太子退就休養以畢高宗三年之制因令必大進呈詔草二月壬戌孝宗吉服御紫宸殿行內禪禮應奉官以次稱賀內侍固請帝坐帝固辭內侍扶掖至七八乃微坐復興次丞相率百僚稱賀禮畢樞密院官升殿奏事帝立聽班退孝宗及喪服御後殿帝侍立尋登輦同詣重華宮帝還內即上尊號曰至尊壽皇聖帝皇后曰壽成皇后壽皇聖帝詔立帝元妃李氏爲皇后甲子

帝率群臣朝重華宮大赦百官進秩一級優賞諸軍
蠲公私逋負及郡縣淳熙十四年以前稅後丙寅帝
率群臣詣重華宮上尊號冊寶以閣門舍人譙熙載
姜特立並知閣門事庚午詔五日一朝重華宮辛未
尊皇太后曰壽聖皇太后壬申詔內外臣僚陳時政
闕失四方獻歌頌者勿受遣羅點等使金告即位癸
酉詔戒敕將帥賜前宰執從官詔訪以得失乙亥詔
兩省官詳定內外封章具要切者以聞遣諸葛汝瑞
等使金弔祭丙子詔戒敕官吏已卯詔官吏贓罪顯
著者重罰毋貸辛巳以生日爲重明節丁亥詔百官

輪對已丑詔編壽皇聖政庚寅詔中書舍人羅點具
可爲臺諫者點以葉適吳鎰孫逢吉張體仁馮震武
鄭湜劉崇之沈清臣八人上之三月壬辰以周必大
爲少保留正轉正奉大夫丙申遣沈揆等使金賀即
位詔侍從兩省臺諫各舉可任湖廣及四川總領者
一人己亥子擴進封嘉王癸卯金遣王元德等來告
哀戊申以壽皇却五日之朝詔自今月四朝重華宮
甲寅以史浩爲太師伯圭爲少師少保士欽爲少傅
昭慶軍節度使士峴爲少保戊午金遣張萬公等來
致遺留物己未以左補闕薛叔似爲將作監右拾遺

許及之爲軍器監拾遺補闕官自此罷詔東宮書籍
並賜嘉王夏四月丙寅有事于太廟丁卯四川應起
經總制錢存留三年代輸鹽酒重額癸酉姪柄進封
許國公乙亥以兩浙犒賞庫隸諸州歲入六十五
萬尋減三十萬戊寅金遣徒單鑑等來告即位以權
兵部侍郎何澹爲右諫議大夫丙戌有事于景靈宮
五月甲午以王蘭知樞密院事兼參知政事丙申周
必大罷爲觀文殿大學士判潭州常德府辰沅靖州
大水入其郛丁酉詔丞相以下月一朝重華宮戊戌
罷周必大判潭州之命許以舊官爲醴泉觀使戊申

以和義郡夫人黃氏爲貴妃右丞相留正論知閣門
事姜特立罷之閏月庚申朔詔內侍陳源許在外任
便居住免郡縣淳熙十四年以前私負十五年以後
輸息及本者亦蠲之壬戌以趙雄爲寧武軍節度使
開府儀同三司進封衛國公仍判江陵府庚午詔罷
賣浙西常平官田癸酉詔季秋有事于明堂以高宗
配丙子趙雄疾甚改判資州戊寅蠲郡縣第五等戶
身丁錢及臨安第五等戶和買絹各一年仍出錢二
十三萬緡振臨安貧民己卯階州大水入其郭壬午
大理獄空乙酉御後殿慮囚六月庚寅鎮江大水入

其郭癸卯詔自今臣僚奏請事涉改法者三省樞密院詳具以聞秋七月辛酉儒林郎倪恕等以封事可采遷官免文解有差戊辰遣謝深甫等賀金主生辰庚辰下詔恤刑八月甲午升恭州爲重慶府丙申減兩浙月椿等錢歲二十五萬五千緡己亥王淮薨癸丑金遣溫迪罕肅等來賀即位九月癸亥金遣完顏守真等來賀重明節減紹興和買絹歲額四萬四千餘匹乙丑戒執政侍從臺諫毋移書以薦舉請託南劍州火降其守臣一官仍令優加振濟戊辰詔侍從各舉公正彊敏之士掌任守令及職事官材堪御史

者一人甲戌詔監司帥守秩滿到闕薦所部廢吏一
二人遣郭德麟等使金賀正旦冬十月庚子罷樞密
院審察諸軍之制壬寅蠲楚州高郵盱眙軍民負常
平米一萬四千餘石甲寅大閱十一月庚午詔改明
年爲紹熙元年復置嘉王府翊善以秘書郎黃裳爲
之乙亥詔陳源毋得輒入國門丁丑減江浙月椿錢
額十六萬五千餘緡十二月壬子金遣裴滿餘慶等
來賀明年正旦

紹熙元年春正月丙辰朔帝率群臣詣重華宮奉上
壽聖皇太后至尊壽壽聖皇聖帝壽成皇后冊寶壬申再

蠲臨安府民身丁錢三年壬午何澹請置紹熙會計
錄詔何澹同戶部長貳檢正都司稽考財賦出入之
數以聞二月丁酉雨雹辛亥殿中侍御史劉光祖言
道學非程氏私言乞定是非別邪正從之三月丁卯
詔秀王襲封置園廟班安僖王諱錄趙普後一人庚
午以久雨釋杖以下囚夏四月乙酉詔兩淮措置流
民己丑以伯圭爲太保嗣秀王丁未殿中侍御史劉
光祖以論帶御器械吳端罷戊申賜禮部進士余復
以下五百三十有七人及第出身五月乙卯趙雄坐
所舉以賄敗降封益川郡公削食邑一千戶己未出

吳端爲浙西馬步軍副總管丙寅脩楚州城丙子太白晝見六月丁亥遣丘宙等賀金主生辰丙申以上供等錢償廣州放免身丁錢數甲午御後殿慮囚秋七月癸丑詔秀王諸孫並授南班甲寅以葛邲參知政事給事中胡晉臣簽書樞密院事乙卯以留正爲左丞相王蘭樞密院使癸酉建秀王祠堂于行在八月辛卯立任子中銓入吏部簾試法己亥帝率群臣上壽皇聖帝玉牒日曆于重華宮己酉詔造新曆九月丁巳金遣王脩等來賀重明節己未升劍州爲隆慶府辛酉雷庚午遣蘇山等使金賀正旦冬十月丁

酉詔內外諸軍自今毋置額外制領以下官丙午詔
內外軍帥各薦所部有將才者庚戌詔諭郡縣吏
奉法愛民十一月甲寅安南入貢壬戌潼川轉運判
官王漑擢節漕計代輸井戶重額錢十六萬緡詔獎
之十二月辛巳朔贈左千牛衛大將軍挺爲保寧軍
節度使壬午賜王倫謚曰節愍丙戌罷王藺樞密使
戊子以葛邲知樞密院事胡晉臣參知政事兼同知
樞密院事癸卯詔歲減廣東官賣鹽丙午金遣把德
固等來賀明年正旦戊申浦城盜張海作亂詔提點
刑獄豐誼捕之

二年春正月庚戌朔命兩淮行義倉法壬子詔尊高
宗爲萬世不祧之廟庚申修六合城辛酉金主母徒
單氏殂戊寅雷電雨雹二月庚辰朔大雨雪壬午遣
宋之瑞等使金弔祭癸未名新歷曰會元甲申福建
安撫使趙汝愚等以盜發所部與守臣監司各降秩
一等縣令追停乙酉詔以陰陽失時雷雪交作令侍
從臺諫兩省卿監郎官館職各具時政闕失以聞出
米五萬石賑京城貧民權罷修皇后家廟辛卯布衣
余古上書極諫帝怒詔送筠州學聽讀丁未金遣完
顏亶等來告哀三月丙辰詔監司郡守互送以贓論

丁巳詔自今邊事令宰相與樞密院議仍同簽書丙寅詔福建提點刑獄陳公亮知漳州朱熹同措置漳泉汀三州經界丁卯增廣州摧鋒軍三百人癸酉建寧府雨雹大如桃李壞民居五千餘家温州大風雨雷雹田苗葉果蕩盡丙子出右司諫鄧駟夏四月乙酉從壽皇聖帝壽成皇后幸聚景園丙申詔侍從兩省臺諫及在外侍從之臣各舉所知嘗任監司郡守可充郎官卿監及資歷未深可充諸職事官者各三人辛丑徽州火二日乃滅五月己酉朔福州水辛亥詔六院官許輪對仍入雜壓庚申詔侍從經筵翰

苑官自今並不時宣對庶廣咨詢以補治道戊辰金
州大火己巳潼川崇慶二府大安石泉淮安三軍興
利果合綿漢六州大水六月戊寅詔監司到任半年
條上裕民事如郡守庚辰遣趙靡等賀金主生辰丁
亥以伯圭判大宗正事癸巳詔宰臣執政自今不時
內殿宣引奏事秋七月丁未朔詔故容州編管人高
登追復元官仍贈承務郎己未出會子百萬緡杖兩
淮私鑄鐵錢乙丑復置太醫局己巳興州大水漂沒
數千家八月戊寅何澹以本生繼母喪去官甲申寬
兩浙權鐵之禁九月壬子金遣完顏亮等來賀重明

節召知福州趙汝愚爲吏部尚書壬戌禁職田折變
癸亥遣黃申等使金賀正旦乙丑以久雨命大理三
衙臨安府及兩浙決繫囚釋杖以下已巳詔侍從於
嘗任卿監郎官內選堪斷刑長貳一二人以聞冬十
月丙子朔詔罷經界丁丑築福州外城庚辰減百官
大禮賜物三之一甲申復吳端帶御器械辛卯詔守
令毋征歛病民庚子下詔撫諭四川被水州軍十一月
戊申安定郡王子彤薨己巳冊加高宗徽號曰受命
中興全功至德聖神武文昭仁憲孝皇帝辛未有事
于太廟皇后李氏殺皇貴妃以暴卒聞壬申合祭天

地于園丘以太祖太宗配大風雨不成禮而罷帝既
聞貴妃薨又值此變震懼感疾罷稱賀肆赦不御樓
壽皇聖帝及壽成皇后来視疾帝自是不視朝十二
月庚辰築荆門軍城丁亥帝始對輔臣于內殿乙未
增楚州更戍兵一千五百人庚子復出會子百萬緡
收兩淮鐵錢辛丑金遣完顏宗璧等來賀明年正旦
壬寅資簡普榮四州及富順監旱甲辰詔慶遠軍承
宣使內侍省都知楊皓懷姦兇恣刺面杖脊配吉州
和州防禦使內侍省押班黃邁私相朋附決杖編管
撫州尋送皓撫州邁常州居住是歲建寧府汀州水

階成西和鳳四州及淮東旱振之

三年春正月乙巳朔帝有疾不視朝庚戌蠲秀州上供米四萬四千石歲蠲四川鹽酒重額錢九十萬緡出度僧牒二百收淮東鐵錢丁巳命夔路轉運使通融漕計糴米以備凶荒壬戌罷文州民雜役詔輔臣代行恭謝之禮二月甲戌朔復以兩浙犒賞酒庫隸戶部丁酉申嚴錢銀過淮之禁閏月丙午禁郡縣新作寺觀甲寅以王藺為端明殿學士四川安撫制置使藺辭不行壬戌詔州縣未斷之訟監司毋得移獄違者許執奏甲子成都府路轉運判官王漑以代民輸激賞等絹錢三

十三萬緡詔進一官仍令再任詔賣郡縣沒官田屋
及營田三月甲戌修天長縣城辛巳帝疾稍愈始御
延和殿聽政以子濤爲安定郡王甲申罷雅州稅場
五築峽州城乙酉留正乞去位不許庚寅宜州蠻寇
邊改知鬱州沙世堅知宜州以討之辛卯復監司列
薦法丁酉罷廣東增收鹽斤錢己亥詔技藝補授之
人毋得奏補著爲令庚子監察御史郭德麟以察事
失體出爲湖北提舉常平茶鹽夏四月癸卯補童子
吳綱官甲寅振四川旱傷郡縣乙卯以戶部侍郎丘
密爲煥章閣直學士四川安撫制置使戊午帝朝

重華宮丁卯蠲臨安民元年二年逋賦五月帝有疾
不視朝乙未命漢陽荆門軍復州行鐵錢己亥蠲四
川水旱郡縣租賦仍以兩浙犒賞酒庫隸諸州令戶
部卽官提領歲以四十五萬緡爲額庚子晦常德府
大水入其郭六月辛丑朔下詔戒飭風俗禁民奢侈
興士爲文浮靡吏苟且飾僞者以摧禮部尚書陳騏
同知樞密院事甲辰遣錢之望等賀金主生辰丁未
罷四川諸軍歲起西兵廢光州定城監壬子慮囚戊
午以伯圭爲太師甲子增捕獲私鑄銅錢賞格丙寅
以太尉郭師禹爲少保秋七月己巳刺沿邊盜萬人

爲諸州禁軍壬申監文思院常良孫坐賊配海外益
國公周必大坐繆舉良孫降榮陽郡公省廣西郡縣
官甲戌台州水壬午瀘州騎射卒張信等作亂殺其
帥臣張孝芳甲申軍士卞進張昌擊殺信增嘉王府
講讀官二貲壬辰修揚州城八月甲寅詔兩淮行鐵
錢交子戊午總領四川財賦楊輔奏已蠲東西兩川
畸零絹錢四十七萬緡激賞絹六萬六千匹詔獎之
自是歲以爲例九月甲戌修德安府外城乙亥金遣
僕散端等來賀重明節戊子遣鄭汝諧等使金賀正
旦丙申勸兩淮民種桑冬十月壬寅修大禹陵廟丙

午修潭州城辛亥帝詣重華宮進香庚申會慶節丞相率百官詣重華宮拜表稱賀十一月壬申振襄陽府被水貧民哭酉減蘄州歲鑄錢二十萬緡丙戌日南至丞相率百官詣重華宮拜表稱賀兵部尚書羅點給事中尤袤中書舍人黃裳皆上疏請帝朝重華宮吏部尚書趙汝愚亦因面對以請帝開納辛卯帝朝重華宮皇后繼至都人大悅癸巳蠲湖南北京西江西郡縣月椿經總制錢歲二十三萬餘緡戊戌詔李純乃皇后親姪可特除閣門宣贊舍人十二月癸卯帝率群臣上壽皇聖帝玉牒聖政會要于重華宮

丙午蠲歸正人賦役三年辛亥以留正爲少保乙丑
金遣溫敦忠等來賀明年正旦是歲江東京西湖北水
四年春正月己巳朔帝朝重華宮辛卯蠲臨安府民
身丁錢三年二月戊戌朔詔陳源特與在京宮觀丙
寅貸淮西民市牛錢出米七萬石振江陵饑民甲戌
皇孫生三月丙子帝朝重華宮皇后役辛巳以葛邲
爲右丞相胡晉臣知樞密院事陳騭參知政事趙汝
愚同知樞密院事甲申監察御史汪義端奏汝愚執
政非祖宗故事請罷之疏三上不報辛卯義端罷癸
巳帝役壽皇聖帝壽成皇后辛聚景園乙未修巢縣

城夏四月己酉罷括賣四川沿邊郡縣官田五月丙寅朔復永州義保已已賜禮部進士陳亮以下三百九十有六人及第出身進士李僑年五十四調成都司戶參軍自以祿不及養乞以一官回贈父母帝嘉其志特詔以本官致仕父母皆與初品官封丙子淮西大水丙戌紹興大水召浙東總管姜特立丞相留正以論特立不行乞罷相不報壬辰太尉利州安撫使吳玠卒四川制置使丘密承制以總領財賦揚輔權安撫使命統制官李世廣權管其軍六月丙申朔留正出城待罪振江浙兩淮荆湖被水貧民戊戌秘

書省著作郎沈有開著作佐郎李唐卿祕書郎范黼
彭龜年校書郎王奭正字蔡幼學顏棫吳獵項安世
上疏乞寢姜特立召命已亥遣許及之等賀金主生
辰壬寅詔市淮馬充沿江諸軍戰騎戊申胡晉臣薨
己酉御後殿慮囚癸丑蠲臨安增民稅錢八萬餘緡
甲寅太白晝見甲子雨雹秋七月乙丑朔太白晝見
丙寅大雨雹己巳留正復論姜特立繳納出身以來
文字待罪于范村丙子以不雨命諸路提刑審斷滯
獄戊寅命臨安府及三衙決繫囚釋杖以下壬午以
趙汝愚知樞密院事吏部尚書余端禮同知樞密院

事陳源爲內侍省押班癸未禁邕州左右兩江販鬻
生口乙酉叙州夷賊沒該落無等寇邊遣兵討平之
八月丙申蠲紹興丁鹽茶租錢八萬二千餘緡丁酉
罷郡縣賣沒官田癸丑詔三省議振恤郡縣水旱丁
巳贈吳挺少保其子曦落階官起復濠州團練使帶
御器械戊午振江東浙西旱傷貧民九月巳巳
金遣董師中等來賀重明節庚午重明節百官上壽
侍從兩省請帝朝重華宮不聽巳卯上壽聖皇太后
尊號曰壽聖隆慈備福皇太后壬午遣倪思等使金
賀正旦甲申帝將朝重華宮皇后止帝中書舍人陳

傳良引裾力諫不聽戊子著作郎沈有開祕書郎彭
龜年禮部侍郎倪思等咸上疏請朝重華宮冬十月
丙午內教三衛諸軍已酉朝獻于景靈宮夜地震庚
戌朝獻于景靈宮夜地震壬子祕書省官請朝重
華宮疏三上不報甲寅雨土工部尚書趙彥逾等上
疏重華宮乞會慶聖節勿降旨免朝壽皇曰朕自秋
涼以來思與皇帝相見卿等奏疏已令進御前矣明
日會慶節帝以疾不果朝丞相葛邲率百官賀于重
華宮侍從上章居家待罪詔不許嘉王府翊善黃裳
上疏請誅內侍楊舜卿臺諫張叔椿章穎上疏乞罷

黜戊午太學生汪安仁等二百一十八人上書請朝
重華皆不報己未丞相以下奏事重華宮庚申帝將
朝重華宮復以疾不果丞相以下上疏自劾請罷政
彭龜年請逐陳源以謝天下皆不報十一月辛未日
中有黑子壬申侍從兩省趙彥逾等十一人同班奏
事癸酉太白晝見地生毛夜有赤雲白氣戊寅帝朝
重華宮都人大悅遣右司郎官徐誼召留正于城外
庚辰正始入朝復赴都堂視事命姜特立還故官日
中黑子滅癸未帝率群臣奉上皇太后冊寶于慈福
宮十二月戊戌帝朝重華宮壬寅右司諫章穎以地

震請罷葛邲疏十餘上不報甲辰命沿邊守臣三年
爲任己酉詔監司帥守毋獨負薦士庚戌趙雄薨甲
寅復四川鹽合同場舊法丁巳振江浙流民己未金
遣完顏弼等來賀明年正旦

五年春正月癸亥朔帝御大慶殿受群臣朝遂朝重
華宮次詣慈福宮行慶壽禮推恩如淳熙十年故事
癸酉壽皇聖帝不豫丙子大理獄空癸未葛邲罷丙
戌寬紹興民租稅二月乙未趙汝愚余端禮以奏除
西帥不行居家待罪戊戌荆鄂諸軍都統制張詔爲
成州團練使興州諸軍都統制庚戌禁湖南江西遏

糴三月癸亥合利州東西爲一路己巳壽成皇后生辰免過宮上壽夏四月甲午帝幸玉津園皇后及後宮皆從乙未壽皇聖帝幸東園丙申史浩薨己亥朝獻于景靈宮壬寅以不雨命大理三衙臨安府及兩浙決繫囚釋杖以下癸卯雨土甲辰侍從入對請朝重華宮己酉太學生程肖說等以帝未朝移書大臣事聞帝將以癸丑日朝至期丞相以下入宮門以俟日昃帝復以疾不果出侍從館學官上疏乞罷黜居家待罪職事官請去待罪者百餘人詔不許丙辰侍講黃裳祕書少監孫逢吉等再上疏以請丁巳起居

卽兼權中書舍人陳傳良請以親王執政或近上宗戚一人充重華宮使臺諫交章劾內侍陳源楊舜卿林億年離間兩宮請罷逐之五月辛酉朔辰州獠賊寇邊甲子侍從入對未得見宰執詣重華宮問疾不及引陳傳良繳上告敕出城待罪丁卯以壽皇聖帝疾棘命丞相以下分禱天地宗廟社稷戊辰丞相留正等請帝侍疾正引裾隨帝至福寧殿久之乃泣而出辛未丞相以下以所請不從求退帝命皆退於是丞相以下遂出城待罪知閤門事韓侂冑請宣押入城許之追封史浩爲會稽郡王乙亥帝將朝重華宮

復不果戊寅以壽皇聖帝疾赦權刑部尚書京鏐入對請朝重華宮庚辰丞相以下詣重華宮問疾癸未起居舍人彭龜年叩頭請奏事詔令上殿乃請朝重華宮甲申從官列奏以請嘉王府翊善黃裳講讀官沈有開彭龜年奏乞令嘉王詣重華宮問疾許之王至重華宮壽皇爲之感動丙戌樞戶部侍郎袁說友入對請朝重華宮六月遣梁總等賀金主生辰戊戌夜壽皇聖帝崩遺詔改重華宮爲慈福宮建壽成皇后殿於宮後以便定省以重華宮錢銀一百萬緡賜內外軍先是丞相留正知樞密院事趙汝愚參知政

事陳騷同知樞密院事余端禮聞壽皇聖帝大漸見帝于後殿力請帝朝重華宮皇子嘉王亦泣以請不聽至是丞相正等聞壽皇聖帝崩乃率百官聽遺詔于重華宮己亥丞相以下上疏請詣重華成禮庚子遣薛叔似等使金告哀辛丑丞相率百官拜表請就喪次成服壬寅壽皇大歛皇子嘉王復入奏事詔俟疾愈過宮行禮丞相以下請皇太后垂簾聽政不許請代行祭奠禮許之仍有旨皇帝有疾聽就內中成服夜白氣亘天乙巳尊壽聖隆慈備福皇太后爲太皇太后壽成皇后爲皇太后己酉白氣亘天乙卯遣

林湜等使金致遺留物秋七月辛酉丞相留正稱疾
乞罷政遂逃歸初正等屢請立嘉王爲皇太子帝許
之正擬指揮以進奉御筆歷事歲久念欲退閑正得
之大懼乃謀退焉甲子太皇太后以皇帝疾未能執
喪命皇子嘉王即皇帝位于重華宮之素幄尊皇帝
爲太上皇帝皇后爲壽仁太上皇后移御泰安宮慶
元元年十一月戊戌上尊號曰聖安壽仁太上皇帝
六年八月庚寅太上皇帝不豫辛卯崩于壽康宮年
五十有四十一月丙寅謚曰憲仁聖哲慈孝皇帝廟
號光宗嘉泰三年十一月壬申加謚循道憲仁明功

茂德溫文順武聖哲慈孝皇帝

贊曰光宗幼有令聞嚮用儒雅逮其即位總權綱屏
嬖幸薄賦緩刑見於紹熙初政宜若可取及夫宮闈
妬悍內不能制驚憂致疾自是政治日昏孝養日怠
而乾淳之業衰焉

本紀卷第三十六

本紀卷第三十七

宋史三十七

開禧儀司上柱國錄國事兼書丞相監修國史領經筵事都統魏良弼等奉

勅修

寧宗一

寧宗法天備道純德茂功仁文哲武聖睿恭孝皇帝
諱擴光宗第二子也母曰慈懿皇后李氏光宗為恭
王慈懿夢日墜于庭以手承之已而有娠乾道四年
十月丙午生于王邸五年五月賜今名十一月乙丑
授右千牛衛大將軍七年光宗為皇太子淳熙五年
十月戊午遷明州觀察使封英國公七年二月初就

傳九年正月始冠十年九月己巳始預朝參十一年
當出閣兩宮愛之不欲令居外乃建第東宮之側以
十月甲戌遷焉十二年三月乙酉遷安慶軍節度使
封平陽郡王八月辛酉納夫人韓氏十六年二月壬
戌光宗受禪三月己亥拜少保武寧軍節度使進封
嘉王帝自弱齡尊師重傳至是始置翊善以沈清臣
為之紹熙元年春宰相留正請立帝為儲嗣五年六
月戊戌孝宗崩光宗以疾不能出壬寅宰臣請太皇
太后垂簾聽政不許請代行祭奠之禮從之丁未宰
臣奏云皇子嘉王仁孝夙成宜正儲位以安人心越

六日奏三上從之明日遂擬旨以進是夕御批付丞相云歷事歲久念欲退閑七月辛酉留正以疾辭去知樞密院事趙汝愚見正去乃遣韓侂冑因內侍張宗尹以禪位嘉王之意請于太皇太后不獲遇提舉重華宮關禮侂冑因其問告之禮繼入內泣請于太皇太后太皇太后乃悟令諭侂冑曰好為之侂冑出告汝愚命殿帥郭杲夜分兵衛南北翌日禪祭汝愚率百官詣大行樞前太皇太后垂簾汝愚率同列拜奏皇帝疾不能執喪臣等乞立皇子嘉王為太子以安人心乃奉御批八字以奏太皇太后曰既有御

筆卿當奉行汝愚曰內禪事重須議一指揮太皇太后允諾汝愚袖出所授以進云皇帝以疾未能執喪曾有御筆欲自退閑皇子嘉王擴可即皇帝位尊皇帝為太上皇皇后為太上皇后太皇太后覽畢曰甚善汝愚出以旨諭帝帝固辭曰恐負不孝名汝愚曰天子當以安社稷定國家為孝今中外憂亂萬一變生置太上皇何地衆扶入素幄披黃袍方却立未坐汝愚率同列再拜帝詣几筵歟哭盡哀須臾立仗訖催百官班帝衰服出就重華殿東廡素幄立內侍扶掖乃坐百官起居訖乃入行禪祭禮詔建泰安宮以

奉太上皇太上皇后汝愚卽喪次請召還留正乙丑
太皇太后命立崇國夫人韓氏為皇后丙寅大赦百
官進秩一級賞諸軍詔車駕五日一朝泰安宮百官
月兩朝以卽位告于天地宗廟社稷丁卯侍御史張
叔椿劾留正擅去相位詔以叔椿為吏部侍郎戊辰
詔求直言遣鄭湜使金告禪位己巳以趙汝愚兼參
知政事庚午召秘閣脩撰知潭州朱熹詣行在壬申
建泰安宮乙亥以趙汝愚為右丞相參知政事陳騤
知樞密院事余端禮參知政事仍兼同知樞密院事
汝愚辭不拜賜前宰執侍從詔訪以得失丙子大風

戊寅詔秋暑太上皇帝未須移御卽以寢殿為泰安宮以殿前都指揮使郭杲為武康軍節度使庚辰率群臣拜表于泰安宮辛巳以趙汝愚為樞密使保大軍節度使郭師禹為攢宮總護使壬午侍御史章穎等劾內侍林億年陳源楊舜卿詔億年源與在外宮觀舜卿在京宮觀韓侂冑落階官為汝州防禦使癸未余端禮辭兼同知樞密院事甲申以兵部尚書羅點簽書樞密院事詔兩省官詳定應詔封事具要切者以聞戊子詔百官輪對罷楊舜卿在京宮觀林億年常州居住陳源撫州居住八月己丑朔安定郡王

子濤薨辛卯初御行宮便殿聽政癸巳以朱熹為煥
章閣待制兼侍講甲午增置講讀官以給事中黃裳
中書舍人陳傅良彭龜年等為之丁酉以生日為天
祐節己亥率群臣朝泰安宮辛丑詔諸道舉廉吏糾
汚吏壬寅詔經筵官開陳經旨敕正闕失進封弟許
國公柄為徐國公癸卯加嗣濮王士欽少師郭師禹
少傅夏執中少保乙巳詔晚講官坐講丁未復罷經
筵坐講命三省議振恤諸路郡縣水旱乙卯加安南
國王李龍翰思忠功臣詔歲減廣西鹽額十萬緡丙
辰留正罷以觀文殿大學士判建康府以趙汝愚為

右丞相丁巳詔侍從兩省臺諫各舉通亮公清不植
黨與曾任知縣者二人九月己巳命趙汝愚朝獻景靈
宮庚子命嗣秀王伯圭朝饗太廟是日羅點薨辛未合
祭天地于明堂大赦壬申以刑部尚書京鏐簽書樞
密院事甲戌下詔撫諭諸將改天祐節為瑞慶節冬
十月己丑右諫議大夫張叔椿再劾留正擅去相位
詔落正觀文殿大學士庚寅更泰安宮為壽康宮辛
卯命四川制置司銓量諸州守臣癸巳雷乙未詔以
陰陽謬鑿雷電非時令臺諫侍從各疏朝政闕失以
聞戊戌復許武舉人試換文資庚子以久雨命大理三

衙臨安府兩浙州縣決繫囚釋杖以下辛丑減兩浙
江東西路和市折帛錢蠲兩浙路丁鹽身丁錢一年
雅州蠻寇邊土丁拒退之尋出降甲辰以朱熹言趣
後省看詳應詔封事乙巳上大行至尊壽皇聖帝謚
曰哲文神武成孝皇帝廟號孝宗丙午復以朱熹奏請
卻瑞慶節賀表庚戌改上安穆皇后謚曰成穆皇后
安恭皇后謚曰成恭皇后壬子遣曾三復使金賀正
旦丙辰上孝宗皇帝冊寶于重華殿成穆皇后成恭
皇后冊寶于本室是月建福寧殿閏月庚申以吏部
尚書鄭僑等奏請祧僖宣二祖正太祖東嚮之位尋

立僖祖別廟以藏順翼宣三祖之主乙丑遣林季友使
金報謝戊辰金遣使來弔祭戊寅侍講朱熹以上疏
忤韓侂冑罷趙汝愚力諫不聽臺諫給舍交章請留
朱熹亦不聽詔兩省臺諫侍從各舉宗室有文學器
識者二人壬午詔改明年為慶元元年十一月甲午
復加安南國王李龍翰濟美功臣丙午帝自重華宮
還大內庚戌以宜州觀察使韓侂冑兼樞密都承旨
辛亥雨木冰詔行孝宗三年喪制命禮官條具典禮
以聞升明州為慶元府乙卯權檟孝宗皇帝于永阜
陵十二月丁巳朔禁民間妄言宮禁事乙丑吏部侍

卽彭龜年上疏言韓侂冑假託聲勢竊弄威福乞黜之以解天下之疑詔罷龜年進侂冑一官與在京宮觀趙汝愚請留龜年不聽御史中丞謝深甫劾陳傅良罷之戊辰以陳康伯配饗孝宗廟庭己巳陳騭罷庚午以余端禮知樞密院事京鏜參知政事鄭僑同知樞密院事辛未監察御史劉德秀劾起居舍人劉光祖罷之癸酉金遣使來賀登位上孝宗廟樂曰大倫之舞甲戌祔孝宗神主于太廟丁丑減臨安紹興二府死罪以下囚釋杖以下蠲民緣釐官役者賦戊寅加郭師禹少師進封永寧郡王癸未金遣使來賀

明年正旦是歲兩浙淮南江東西踞水旱振之仍蠲其賦

慶元元年春正月丁巳朔蠲兩淮租稅壬寅黎州蠻寇邊官軍戰却之乙巳蠲台嚴湖三州貧民身丁折帛錢一年詔兩浙淮南江東踞荒歉諸州收養遺棄小兒辛亥以久雨振給臨安貧民丙辰白虹貫日二月丁巳朔詔兩淮諸州勸民墾闢荒田壬戌詔嗣秀王伯圭贊拜不名癸亥以久雨釋大理三衙臨安府兩浙踞杖以下囚丁卯詔帥臣監司歲終考察郡守臧否以聞戊寅以右正言李沐言罷趙汝愚為觀文

殿大學士知福州己卯雨土以余端禮兼參知政事
庚辰兵部侍郎章穎以黨趙汝愚罷甲申謝深甫等
再劾汝愚詔與宮觀三月丙戌朔日有食之庚寅太
白經天辛亥詔四川歲發西兵詣行在如舊制癸丑
命侍從臺諫兩省集議江南沿江諸州行鐵錢利害
甲寅國子祭酒李祥博士楊簡以黨趙汝愚罷夏四
月丁巳太府寺丞呂祖儉坐上疏留趙汝愚及論不
當黜朱熹彭龜年等忤韓侂冑送韶州安置己未以
余端禮為右丞相京鏜知樞密院事鄭僑參知政事
謝深甫簽書樞密院事庚申太學生楊宏中等六人

以上書留趙汝愚章穎李祥楊簡請黜李沐詔宋中
等各送五百里外編管中書舍人鄧驛上疏救之不
聽戊辰臨安大疫出內帑錢為貧民醫藥棺斂費及
賜諸軍疫死者家五月戊子呂祖儉改送吉州安置
戊戌詔戒百官朋比丙午詔諸路提舉司置廣惠倉
脩胎養令辛亥減大理三衙臨安府雜犯死罪以下
囚釋杖以下六月丁巳復留正觀文殿大學士充醴
泉觀使右正言劉德秀請考核真偽以辨邪正己未
遣汪義端賀金主生辰庚午詔三衙江上諸軍主帥
將佐初除舉自代一人歲薦所知二人癸酉以韓侂

胄為保寧軍節度使提舉萬壽觀秋七月壬辰加周
必大少傅丁酉落趙汝愚觀文殿大學士罷宮觀已
亥太白晝見八月己巳詔內外諸軍主帥條奏武備
邊防之策以聞九月壬午朔蠲臨安府水災貧民賦
乙酉以久雨決繫囚丙戌災惑入太微甲辰遣黃艾
使金賀正旦己酉蠲台嚴湖三州被災民丁酉冬十
月己卯詔三省樞密院條上合教諸軍例乙丑升秀
州為嘉興府舒州為安慶府嘉州為嘉定府英州為
英德府戊辰金遣吳鼎樞來賀瑞慶節壬申封子恭
為安定郡王十一月己丑雨土庚寅以弟徐國公柄

為昭慶軍節度使戊戌加上壽聖隆慈備福太皇太后尊號曰壽聖隆慈備福光佑太皇太后壽成皇太后曰壽成惠慈皇太后太上皇曰聖安壽仁太上皇太上皇后曰壽仁太上皇后丙午以監察御史胡紘言責授趙汝愚寧遠軍節度副使永州安置丁未命宰執大閱十二月癸亥置楚州弩手効用軍丙子命朱熹為煥章閣待制辭丁丑金遣紘石烈正來賀明年正旦

二年春正月庚寅以余端禮為左丞相京鏜為右丞相鄭僑知樞密院事謝深甫參知政事御史中丞何

澹同知樞密院事庚子趙汝愚卒于永州甲辰右諫
議大夫劉德秀劾留正引用偽學之黨詔落正觀文
殿大學士罷宮觀二月辛酉詔追復趙汝愚官許歸
葬以中書舍人吳宗旦言罷之辛未再蠲臨安府民
身丁錢三年三月丙申命諸軍射鐵簾己亥進封弟
柄為吳興郡王丙午有司上慶元會計錄夏四月甲
子余端禮罷壬申以何澹參知政事吏部尚書葉翥
簽書樞密院事乙亥增置監察御史一員五月辛己
以旱禱于天地宗廟社稷詔大理三衙臨安府兩浙
州縣決繫囚乙酉申嚴獄囚瘦死之罰辛卯賜禮部

進士鄒應龍以下四百九十有九人及第出身甲午
減諸筈和市折帛錢三年建華文閣以藏孝宗御集
甲辰更慈福宮為壽慈宮六月庚戌遣吳宗旦賀金
主生辰乙丑命監司帥守臧否縣令分三等丙子子
竣生秋七月癸未饗于太廟丙戌減諸筈死罪囚釋
流以下戊子量徙流人呂祖儉等于內郡詔檢正都
司考覈諸筈守臣便民五事以聞戊戌以韓侂冑為
開府儀同三司萬壽觀使八月癸丑奉安孝宗皇帝
成穆皇后成恭皇后神御于景靈宮丙辰以太常少
卿胡紘請權住進擬為學之黨壬戌子竣薨追封充

王謚冲惠九月丁亥復分利州為東西路癸巳嗣濮
王士欽薨追封韶王甲午流星晝隕丁酉遣張貴謨
使金賀正旦冬十月戊申率群臣奉上壽聖隆慈備
福光佑太皇太后壽成惠慈皇太后聖安壽仁太上
皇壽仁太上皇后冊寶于慈福壽康宮辛亥冊皇后
壬戌金遣張嗣來賀瑞慶節甲戌大閱十一月庚寅
詣壽康宮上太上皇帝寬恤詔令壬辰京鏜等上孝
宗皇帝寬恤詔令癸卯賞宜州捕降峒寇功十二月
辛未金遣完顏崇道來賀明年正旦是月監察御史
沈繼祖劾朱熹詔落熹秘閣脩撰罷宮觀竄處士蔡元

字三十九个
定于道州

三年春正月壬寅鄭僑罷癸卯以謝深甫兼知樞密院事二月己酉京鏜等上神宗玉牒高宗實錄丁巳以大理司直邵裒然請詔大臣自今權臣偽學之黨勿除在內差遣詔下其章三月乙未建東華門庚子禁浙西州軍園田壬寅詔自今有司奏讞死罪不當者論如律夏四月丙午雨土命不秬為嗣濮王壬子以旱禱于天地宗廟社稷乙丑雨雹六月戊辰頒淳熙寬恤詔令閏月甲戌內出銅器付尚書省毀之命申嚴私鑄銅器之禁乙亥遣衛涇賀金主生辰甲午

詔留正分司西京邵州居住是夏廣東提舉茶鹽孫
安國遣人捕私鹽于大奚山島民遂作亂秋七月庚
午監察御史沈繼祖錄淹囚四百餘條來上詔進二
官八月戊子復置嚴州神泉監辛卯知廣州錢之望
遣兵入大奚山盡殺島民甲午均諸路職田九月壬
寅以四川旱詔蠲民賦辛酉遣曾炎使金賀正旦乙
丑申嚴帥臣監司臧否郡守之制是月詔監司帥守
薦舉改官勿用爲學之人冬十月癸酉雷丙戌金遣
完顏愈來賀瑞慶節丙申以太皇太后違豫赦十月
辛丑加孝宗皇帝謚曰紹統同道冠德昭功哲文神

武明聖成孝皇帝太皇太后吳氏崩壬寅朝獻于景
靈宮癸卯朝饗于太廟甲辰祀天地于園丘大赦乙
巳詔為大行太皇太后服期丁未遣趙介使金告哀
十二月丙子始御正殿丁丑以大行太皇太后櫬宮
蠲紹興府貧民明年身丁折帛綿絹庚辰罷文武官
納官告綾紙錢甲申雷雨壬乙未金遣奧弋忠孝來賀
明年正旦丁酉以知綿州王沆請詔省部籍偽學姓
名

四年春正月己卯上欽宗皇后諡曰仁懷皇后丙寅
以葉翥同知樞密院事丁卯詔有司寬恤兩浙江淮

荆湖四川流民二月辛未詔兩省侍從臺諫各舉所知一二人毋薦宰執親黨丙子上大行太皇太后謚曰憲聖慈烈皇后三月甲子權攢憲聖慈烈皇后于永思陵乙丑金遣烏林答天益來弔祭夏四月丙戌祔仁懷皇后憲聖慈烈皇后神主于太廟己丑蠲臨安紹興二府租稅有差丙申始御正殿是月右諫議大夫張金請下詔禁偽學遣湯碩使金報謝五月己亥加韓侂胄少傅賜玉帶己酉詔禁偽學六月己巳遣楊王休賀金主生辰癸酉以弟吳興郡王柄為開府儀同三司秋七月辛酉葉翥罷八月丁卯朔以久雨

決繫囚丙子以謝深甫知樞密院事兼參知政事吏部尚書許及之同知樞密院事庚辰白氣亘天丙戌詔以太上皇聖躬清復率群臣上壽尋不克行九月壬寅太白晝見癸卯太白經天丁未頒慶元重脩敕令格式庚申遣馬覺使金賀正且是月詔造新曆冬十月戊子金遣孫鐸來賀瑞慶節十二月丙戌再蠲臨安府民身丁錢三年己丑金遣楊庭筠來賀明年正旦

五年春正月庚子樞密院直省官蔡璉訴趙汝愚定策時有異謀詔下大理捕鞠彭龜年曾三聘等以實

其事中書舍人范仲藝力爭之于韓侂冑事遂寢張
金等復請窮治詔停龜年三聘官壬戌建玉堂二月
癸酉白氣亘天乙酉張金劾劉光祖附和偽學詔房
州居住三月甲午罷監司臧否郡守之制夏五月壬
辰朔新曆成賜名曰統天戊戌賜禮部進士曾從龍
以下四百十有二人及第出身戊申以久雨民多疫
命臨安府振恤之壬子詔諸路州學置武士齋選官
按其武藝六月癸亥遣李大性賀金主生辰秋七月
甲寅禁高麗日本商人博易銅錢八月乙亥白氣亘
天辛巳太祖廟楹生芝率群臣詣壽康宮上壽始見

太上皇成禮而還甲申以過宮上壽禮成中外奉表稱賀丙戌詔減諸路流囚釋杖以下推恩如慶壽故事丁亥進京鐔等官一級戊子立沿邊諸州武舉取士法九月庚寅朔加韓侂冑少師封平原郡王丙辰遣朱致知使金賀正旦冬十月庚申朔封郭師禹為廣陵郡王丙子金遣僕散琦來賀瑞慶節十一月己丑朔詔復右司一員十二月辛酉嗣濮王不祛薨庚午命廣東水土惡弱諸州建安仁宅惠濟倉庫給士大夫死不能歸者乙亥奉安仁懷皇后憲聖慈烈皇后神御于景靈宮甲申金遣范楫來賀明年正旦是

歲饒信江撫嚴衢台七州建昌興國軍廣東諸州皆
水振之

六年春正月己亥子坦生二月戊辰減諸路雜犯死
罪囚釋徒以下己巳雨土己卯率群臣奉上聖安壽
仁太上皇玉牒聖政日曆會要于壽康宮甲申封婕
妤楊氏為貴妃閏月庚寅以京鏐為左丞相謝深甫
為右丞相何澹知樞密院事兼參知政事乙巳復留正
少保觀文殿大學士致仕丁未雨土辛亥以殿前副
都指揮使吳曦為昭信軍節度使三月甲子朱熹卒
辛未從壽成惠慈皇太后幸聚景園己卯安定郡王

子恭覺夏四月己酉命不豐為嗣濮王五月丙辰以
早決中外繫囚除茶鹽賞錢有司上慶元寬恤詔令
役法撮要癸亥避正殿減膳丙寅詔大理三衙臨安
府及諸路闕兩州縣釋杖以下囚戊辰詔侍從臺諫
兩省卿監郎官館職疏陳闕失及當今急務辛未以
久不雨詔中外陳朝廷過失及時政利害壬申雨丁
丑詔三省樞密院擇臣僚封事可行者以聞六月乙
酉朔日有食之丁亥以太上皇后違豫赦戊子太上
皇后李氏崩壬辰遣趙善義賀金主生辰吳玠使金
告哀戊申許及之以母憂去佐秋七月己未初御後

殿丁卯以御史中丞陳自強簽書樞密院事八月庚寅以太上皇違豫赦辛卯太上皇崩甲午遣李寅神使金告哀乙未日中有黑子丙申上大行太上皇后謚曰慈懿皇后丁酉京鏜薨壬寅子坦薨追封邠王謚冲溫癸卯權擢慈懿皇后于臨安府南山之修吉寺九月乙卯祔慈懿皇后神主于太廟甲子發州布衣呂祖泰上書請誅韓侂冑蘇師旦逐陳自強等以周必大代之詔杖祖泰配欽州牢城己巳命謝深甫朝獻景靈宮庚午命嗣濮王不璽朝饗太廟辛未合祭天地于明堂大赦丙子遣丁常任為金國遺留國

信使冬十月丙戌加韓侂冑太傅戊子遣林桶使金
賀正旦庚子復加安南國王李龍翰保節功臣辛丑
雨土十一月癸丑朔詔宗子與愿更名曦為福州觀
察使己未皇后韓氏崩癸亥子增生丙寅東北地震
上大行太上皇謚曰憲仁聖哲慈孝皇帝廟號光宗
乙亥上大行皇后謚曰恭淑皇后十二月癸未朔子
增薨追封郢王謚冲英乙酉日中有黑子辛卯雨土
權攢憲仁聖哲慈孝皇帝于永崇陵己亥金遣烏古
論誼來弔祭壬寅權攢恭淑皇后于臨安府南山之
廣教寺癸卯祔光宗皇帝神主于太廟遣虞儔使金

報謝詔改明年爲嘉泰元年乙巳日中黑子滅蠲臨
安紹興二府民緣攢宮役者賦戊申金遣紇石烈忠
定來賀明年正旦巳酉加吳曦太尉庚戌祔恭淑皇
后神主于太廟詔罷四川總領所所增關外四州營
田租是歲建寧府徽嚴衢婺饒信南劔七州水建康
府常潤楊楚通泰和七州江陰軍旱振之

本紀卷第三十七

本紀卷第三十八

宋史三十八

開府儀同三司上柱國歸國軍事前事嘉承相樞密國史領議事都總裁院等奉
勅修

寧宗二

嘉泰元年春正月戊午申嚴福建科鹽之禁壬戌謝
深甫等薦士三十有五人詔籍名中書以待選擢丁
卯命路鈐按閱諸州兵士毋受饋遺及擅招軍違者
寘諸法庚午以葛邲配饗光宗廟庭丙子金遣完顏
充來弔祭二月戊子詔求明曆之士壬辰開資善堂
遣俞烈使金報謝癸巳監察御史施康年劾少傅觀

文殿大學士致仕周必大首倡偽學私植黨與詔降
為少保修光宗實錄乙未續修吏部七司法己亥初
置教官試于四川辛丑雨土三月丙寅雨雹戊辰復
雨雹頒慶元寬恤詔令後法撮要己巳雨雹戊寅臨
安大火四日乃滅夏四月辛巳詔有司振恤被災居
民死者給錢瘞之壬午下詔自責詔樞密院覈禁衛
班直及諸軍營柵焚燬之數癸未避正殿減膳甲申
命臨安府察姦民縱火者治以軍法內降錢十六萬
緡米六萬五千餘石振被災死亡之家辛卯龍州蕃
部寇邊遣官軍討之詔以風俗侈靡災後官軍營造

務遵法制內出銷金鋪翠焚之通衢禁民無或服用
丁酉御正殿復膳戊戌以潛邸為開元宮丙午詔文
武臣無寓居州仕釐務官著為令五月戊午以旱禱
于天地宗廟社稷詔大理三衙臨安府兩浙州縣決
繫囚癸亥釋諸路杖以下囚除茶鹽賞錢丁卯命有
司舉行寬恤之政十有六條乙亥監太平惠民局夏
允中請用文彥博故事以韓侂胄平章軍國重事韓
侂胄上疏請致仕不許免允中官丙子雨丁丑雨雹
六月辛巳遣陳宗召賀金主生辰丙午太白經天秋
七月乙卯何澹罷丁巳以旱復禱于天地宗廟社稷

壬戌釋大理三衙臨安府及諸路闕兩州縣杖以下
囚癸亥兩電甲子以陳自強參知政事兼同知樞密
院事張金箴書樞密院事丁卯復振被火貧民己巳
以吳曦為興州都統制兼知興州八月己卯減奏薦
恩甲申張金箴以陳自強兼知樞密院事給事中張
巖參知政事右諫議大夫程松同知樞密院事丙戌
復詔侍從臺諫兩省集議沿江八州行鐵錢利害九
月辛亥遣朝臣二人決浙西園田己未兩土辛未遣
李景和使金賀正旦甲戌令禮官纂集孝宗一朝典
禮冬十月甲申詔免瑞慶節諸道入貢丙戌起居郎

王容請以韓侂胄定策事迹付史館從之甲午金遣
徒單懷忠來賀瑞慶節甲辰編光宗御集十一月庚
申蠲潭州民舊輸黃河鐵纜錢丙寅太白晝見十二
月己卯太白經天庚寅復免臨安府民身丁錢三年
辛丑雨土癸卯金遣紇石烈真來賀明年正旦是歲
浙西江東兩淮利州路旱振之仍蠲其賦真里富國
獻馴象二

二年春正月癸亥以知閣門事蘇師旦兼樞密都承
旨丁卯陳自強等上高宗實錄二月甲申追復趙汝
愚資政殿學士丁亥修高宗正史實訓戊子頒治縣

十二事以風厲縣令癸巳禁行私史三月辛亥詔宰
執各舉可守邊郡者二三人己未初命諸路提刑以
五月按部理囚己巳詔諸路帥臣總領監司舉任將
帥者與本軍主帥列上之夏四月庚寅雨雹五月甲
辰朔日有食之己巳賜禮部進士傳行簡以下四百
九十有七人及第出身六月丙子遣趙不艱賀金主
生辰己卯臨安火壬午濬浙西運河辛卯禁都民以
火說相驚者庚子大雨雹秋七月辛亥封子覲為安
定郡王癸亥以旱釋諸路杖以下囚己巳命有司舉
行寬恤之政七條庚午禱于天地宗廟社稷復行寬

恤四事八月丙子以吏部尚書袁說友同知樞密院
事癸未建寶謨閣以藏光宗御集己丑詔作壽慈宮
請太皇太后還內甲午謝深甫等上慶元條法事類
九月己酉朝壽慈宮甲寅修皇帝會要壬戌奉安光
宗皇帝慈懿皇后神御于景靈宮萬壽觀丙寅嗣秀
王伯圭薨追封崇王謚曰憲靖庚午臨安府野蚕成
繭冬十月乙亥上壽成惠慈太皇太后尊號曰壽成
惠聖慈祐太皇太后戊子金遣完顏瑋來賀瑞慶節
乙未遣魯頤使金賀正旦是月追復朱熹煥章閣待
制致仕十一月甲辰始御正殿乙巳重修吏部七司

法庚戌以陳自強知樞密院事前同知樞密院事許
及之參知政事丁巳右文殿楹生芝十二月甲戌日
中有黑子率群臣奉上壽成惠聖慈祐太皇太后冊
寶于壽慈宮甲申立貴妃楊氏為皇后加韓侂胄太
師庚寅大閱閏月丁未詔講官有當開釋者隨事開
陳乙卯以福州觀察使曠為威武軍節度使封衛國
公丁卯金遣使單公弼來賀明年正旦是月復周必
大少傅觀文殿大學士是冬子垌生未踰月薨追封
華王謚冲穆是歲建寧府福汀南劍瀘四州水邵州
旱振之

三年春正月庚辰謝深甫罷壬午置湖南谿洞總首
戊子龍州蕃部復寇邊遣官軍討之甲午張巖罷丙
申以陳自強兼參知政事戊戌幸大學謁大成殿御
化原堂命國子祭酒李寅仲講尚書周官篇遂幸武
學謁武成殿監學官進秩一級諸生推恩賜帛有差
以袁說友參知政事權翰林學士知制誥傅伯壽兼
書樞密院事伯壽辭不拜二月乙巳御文德殿冊皇
后以吏部尚書費士寅簽書樞密院事三月丁丑以
久雨詔大理三衙臨安府決繫囚乙酉幸聚景園夏
四月己亥朔日有食之壬寅福州瑞麥生丙午出封

椿庫兩淮交子一百萬命轉運司收民間鐵錢乙卯
陳自強等上徽宗玉牒孝宗光宗實錄辛酉詔宰執
臺諫子孫毋就試五月戊寅以陳自強為右丞相許
及之知樞密院事仍兼參知政事庚辰以旱詔大理
三衙臨安府釋杖以下囚癸未命有司搜訪舊聞修
三朝正史以書來上者賞之是月以蘇師旦為定江
軍承宣使六月壬寅遣劉甲賀金主生辰己酉減大
理三衙臨安府囚罪一等釋杖以下癸亥太白經天
秋七月辛未領慶元條法事類命殿前司造戰艦十
午權罷同安漢陽蘄春三監鑄錢白虹貫日癸未禁

江浙州縣抑納逃賦乙未加光宗皇帝謚曰循道憲
仁明功茂德溫文順武聖哲慈孝皇帝八月壬寅增
置襄陽騎軍戊申置四川提舉茶馬二員分治茶馬
事丙辰陳自強等上皇帝會要甲子詔刑部歲終比
較諸踣瘦死之數以為數最九月庚午袁說友罷壬
申以宗子希璿為莊文太子嗣更名楷授右千牛衛
將軍癸酉命阮冶鉄冶司毀私錢改鑄己丑詔南郊
加祀感生帝太子庶子星宋星遣張孝曾使金賀正
旦冬十月庚子詔宥呂祖泰癸卯以費士寅參知政
事華文閣學士知鎮江府張孝伯同知樞密院事丙

午命兩淮諸州以仲冬教閱民兵萬弩手丁未大風
戊申龍州蕃部出降壬子金遣完顏奕來賀瑞慶節
十一月壬申上光宗冊寶于太廟癸酉朝獻于景靈
宮甲戌朝饗于太廟乙亥祀天地于園丘大赦癸未
大風己丑安定郡王子覲薨更定選人薦舉改官法
庚寅復置福田居養院命諸路提舉常平司主之十
二月丙辰命四川提舉茶馬通治茶馬事辛酉下詔
戒敕將帥培克金遣獨吉思忠來賀明年正旦是冬
金國多難懼朝廷乘其隙沿邊聚糧增戍且禁襄陽
權場邊釁之開蓋自此始

四年春正月乙亥大風濤天長縣濤癸未日中有黑
子壬辰雨雹瓊州西浮洞逃軍作亂寇掠文昌縣遣
兵討平之二月丁酉置莊文太子府小學教授辛亥
命內外諸軍射鉄帖轉資壬子蠲臨安府逋負酒稅
己未立試刑法避親格庚申夜有赤氣亘天三月丁
卯臨安大火迫太廟權奉神主于景靈宮己巳避正
殿庚午命臨安府振焚室辛未詔修太廟甲戌下詔
罪己乙亥詔百官䟽陳時政闕失庚寅復御正殿夏
四月甲午朔立韓世忠廟于鎮江府命內外諸軍詳
度純隊法甲辰許及之罷振恤江西水旱州縣乙巳

以費士寅兼知樞密院事張孝伯參知政事吏部尚
書錢象祖賜出身同知樞密院事丙辰詔革選舉之
弊五月乙亥詔諸軍主帥各舉部內將材三人不如
所舉者坐之癸未追封岳飛為鄂王六月癸巳遣張
嗣古賀金主生辰丙申置諸軍帳前雄効以軍官子
孫補之壬寅詔侍從臺諫兩省集議裁抑濫賞壬子
詔諸路監司覈實諸州椿積錢米沿江四川軍帥簡
練軍實丁巳增廬州強勇軍為千人秋七月甲子以
旱詔大理三衙臨安府兩浙及諸路決繫囚戊辰禱
于天地宗廟社稷己巳命諸路提刑從宜斷疑獄蠲

內外諸軍通負營運息錢辛未蠲兩浙闕雨州縣逋
租戊子命諸路提刑提舉司措置保伍法八月己亥
陳自強等上皇帝玉牒癸丑詔自今以恩賞進秩歲
毋過二官蠲紹興府攢宮所在民身丁錢絹綿鹽丙
辰除靜江府昭州折布錢戊午張孝伯罷九月乙丑
得四圭有邸王一詔藏于太常壬午遣鄧友龍使金
賀正旦丙戌戒飭兩淮州縣遵守寬恤舊法冬十月
庚子以資政殿大學士淮東安撫使張巖參知政事
士寅金遣完顏昌來賀瑞慶節十一月己未朔詔兩
淮荆襄諸州值荒歉奏請不及者聽先發廩以聞庚

字三十九
午封伯栩為安定郡王壬申白氣亘天庚辰修六合
縣城十二月癸巳詔總覈內外財賦以陳自強兼國
用使費士寅張巖同知國用事己亥詔改明年為開
禧元年壬寅禁州縣挾私籍沒民產甲辰再蠲臨安
府民身丁錢三年乙卯金遣烏林答毅來賀明年正
旦

開禧元年春正月癸酉初置澈浦水軍壬午兩霏二
月癸巳奪徐安國三官癸卯詔國用司立考覈財賦
之法丙午蠲臨安府逋負酒稅三月庚申太白晝見
辛未申嚴民間生子棄殺之禁仍令有司月給錢米

收養辛巳以淮西安撫司所招軍為強勇軍癸未費
士寅罷夏四月戊子朔以錢象祖參知政事兼同知
樞密院事吏部尚書劉德秀簽書樞密院事辛卯以
江陵副都統李奕為鎮江都統皇甫斌為江陵副都
統兼知襄陽府戊戌修憲聖慈烈皇后聖德事迹辛
丑日中有黑子甲寅武學生華岳上書諫朝廷不宜
用兵恐啓邊釁以忤韓侂冑送建寧府編管乙卯大
風五月己巳賜禮部進士毛自知以下四百三十有
三人及第出身復淳熙薦舉改官法乙亥詔以衛國
公曦為皇子進封榮王甲申鎮江都統戚拱遣忠義

人朱裕結弓手李全焚漣水縣是月金國以邊民侵掠及增邊戍來責渝盟六月戊子罷廣東統場八十墟辛卯詔內外諸軍密為行軍之計戊戌命諸路安撫司教閱禁軍己亥遣李壁賀金主生辰庚子進程松資政殿大學士為四川制置使辛丑淮東安撫鄭挺坐擅納北人牛真及劫漣水軍事敗奪二官罷壬寅天鳴有聲復同安漢陽蘄春三監己巳熒惑犯太微右執法陳自強等上新修淳熙以後吏部七司法壬子陳自強及侍御史鄧友龍等請用本朝故事以韓侂冑平章軍國事減大理三衙臨安府囚罪一

等釋杖以下秋七月庚申詔韓侂冑平章軍國事立
班丞相上三日一朝赴都堂治事命興元都統司增
招戰兵丙寅以蘇師旦為安遠軍節度使領閤門事
丁卯詔侍從兩省臺諫在外待制學士已上及內外
文武官各舉將帥邊守一二人戊辰贈趙汝愚少保
己卯韓侂冑等上高宗御集壬午詔諸路提刑提舉
司措置保甲癸未以韓侂冑兼國用使以旱詔大理
三衙臨安府兩浙州縣及諸路決繫囚八月丙戌朔
蠲兩浙關兩州縣贓賞錢丁亥命湖北安撫司增招
神勁軍癸巳雨乙巳以殿前副都指揮使郭倪為鎮

江都統兼知揚州是月贈宇文虛中少保追封劉光
世為鄜王閏月戊寅韓侂冑等上欽宗玉牒憲聖慈
烈皇后聖德事迹九月丁亥劉德秀罷庚子詔官吏
犯贓追還所受如舊法丁未遣陳景俊使金賀正旦
庚戌大風冬十月甲子江州守臣陳鑄以歲旱圖獻
瑞未詔奪一官丙寅升嘉定府為嘉慶軍庚午金遣
紇石烈子仁來賀瑞慶節復置和州馬監十一月乙
酉置殿前司神武軍五千人屯揚州乙未申嚴告訐
之禁十二月癸丑朔脩孝宗光宗御集庚午詔兩淮
京西監司帥守講行寬恤之政增刺馬軍司弩手癸

酉詔永除兩浙身丁錢絹戊寅金遣趙之傑來賀明年正旦入見禮甚倨韓侂冑請帝還內詔使人更以正旦朝見著作郎朱質上書請斬金使不報是歲真里富國獻瑞象江浙福建二廣諸州旱兩淮京西湖北諸州水振之

二年春正月癸未朔蠲兩浙身丁紬綿癸巳再給軍士雪寒錢發米振給貧民以金使悖慢館伴使副以下奪官有差乙未增太學內舍生為百二十人辛丑更名國用司曰國用參計所己酉雷雨雹辛亥詔坑戶毀錢為銅者不赦仍籍其家著為令是月雅州

蠻高吟師寇邊遣官軍討之二月癸丑壽慈宮火甲寅太皇太后移居大內車駕月四朝乙卯以火災避正殿徹樂丁巳以久雨詔大理三衙臨安府及諸路決繫囚已卯復御正殿三月癸巳以程松為四川宣撫使吳曦為宣撫副使甲午頒開禧重脩七司法丁酉詔諸路監司歲十一月按部理囚如五月之制己亥從太皇太后幸聚景園乙巳錢象祖懷姙避事奪二官信州知樞密院事丙午以錢象祖懷姙避事奪二官信州居住己酉知處州徐邦憲入見請立太子因以肆赦弭兵侍御史徐枬劾罷之夏四月己未雅州蠻作亂

焚礪門砦官軍失利庚申四川宣撫司復調御前大
軍徃討之甲子以薛叔似為兵部尚書湖北京西宣
撫使鄧友龍為御史中丞兩淮宣撫使下納粟補官
之令戊辰以吳曦兼陝西河東路招撫使己巳調三
衙兵增戍淮東庚午追奪秦檜王爵命禮官改謚乙
亥以郭倪兼山東京東路招撫使鄂州都統趙淳兼
京西北路招撫使皇甫斌兼京西北路招撫副使丁
丑吳曦遣其客姚淮源獻關外四州于金求封蜀王
鎮江都統制陳孝慶復泗州江州統制許進復新息
縣戊寅光州忠義人孫成復褒信縣五月辛巳朔陳

孝慶復虹縣吳興郡王柄薨追封沂王謚曰靖惠癸未禁邊郡官吏擅離職守丙戌江州都統王大節引兵攻蔡州不克軍大潰丁亥下詔伐金癸巳以伐金告于天地宗廟社稷皇甫弼引兵攻唐州敗績興元都統秦世輔出師至城固縣軍大亂甲午賜宗室希瞿子名均命為沂王柄後補千牛衛將軍以池州副都統郭倬主管馬軍行司公事李汝翼會兵攻宿州敗績壬寅太白晝見簡荊襄兩淮田卒以備戰兵癸卯郭倬等還至蘄縣金人追而圍之倬執馬軍司統制田俊邁以與金人乃得免六月壬子王大節除名

袁州安置尋徙封州癸丑建康都統李爽攻壽州敗績甲寅鄧友龍罷以江南東路安撫使立崇為刑部尚書兩淮宣撫使乙卯雅州蠻高吟師出降官軍殺之丁巳減大理三衙臨安府囚罪一等釋杖以下奪郭倬李汝翼二官辛酉奪皇甫斌三官甲子李爽罷丁卯曲赦泗州減雜犯死罪囚餘皆除之蠲其租稅三年建康副都統田琳復壽春府戊辰雅州蠻復寇邊甲戌奪李爽三官汀州居住再奪皇甫斌五官南安軍安置丙子奪鄧友龍三官興化軍居住戊寅蘇師旦罷是月命立崇至楊州部署諸將悉三衙江上

軍分守江淮要害金人封吳曦為蜀王秋七月辛巳
復紹興邊郡賞奪蘇師旦三官衡州居住仍籍其家
罷旱傷州軍比較租賦一年詔侍從臺諫兩省卿監
卽官監司郡守前宰執侍從各舉人材二三人壬午
雅州蠻出降庚子蘇師旦除名韶州安置癸卯以張
巖知樞密院事禮部尚書李壁參知政事乙巳置沂
王府小學教授八月丙寅有司上開禧刑名斷例斬
郭倬于鎮江戊辰再奪李爽三官南雄州安置辛未
詔諸州無證有佐之獄毋奏裁壬申以淮東安撫司
所招軍為御前強勇軍九月壬午金兵攻奪和尚原

已丑朝獻于景靈宮庚寅朝饗于太廟辛卯合祭天
地于明堂大赦乙巳賞復泗州功冬十月戊申朔詔
內外軍帥各舉智勇可將帥者二人辛酉以將士暴
露罷瑞慶節宴丙子金人自清河口渡淮遂圍楚州
十一月庚辰命主管殿前司公事郭杲領兵駐真州
以援兩淮辛巳金人破棗陽軍甲申以立憲簽書樞
密院事督視江淮軍馬金人犯神馬坡江陵副都統
魏交諒突圍趨襄陽乙酉趙淳焚樊城戊子金人犯
廬州田琳拒退之癸巳以金人犯淮告于天地宗廟
社稷乙未避正殿減膳以湖廣總領陳謙為湖北京

西宣撫副使丙申金人去廬州丁酉金人犯舊岷州
守將王喜遁去戊戌金人圍和州守將周虎拒之金
人破信陽軍辛丑金人圍襄陽壬寅金人破隨州癸
丑太皇太后賜錢一百萬緡犒賞軍士詔諸路招填
禁軍以待調遣甲辰金人犯真州乙巳金人破西和
州是月濠州安豐軍及邊屯皆為金人所破十二月
戊申金人圍德安府守將李師尹拒之庚戌金人破
成州守臣辛禎之遁去吳曦焚河池縣退屯青野原
辛亥釋大理三衙臨安府杖以下囚癸丑金人去和
州甲寅金人攻六合縣郭倪遣前軍統制郭僕救之

遇于胥浦橋大敗倪棄楊州走丁巳金人破大散關
戊午熒惑守太微癸亥魏友諒軍潰于花泉走江陵
丁卯金人犯七方關興州中軍正將李好義拒卻之
戊辰吳曦還興州金人自淮南退師留一軍據濠州
己巳罷郭倪奪三官責授果州團練副使南康軍安
置庚午薛叔似陳謙罷以京湖北路安撫使吳玠為
湖北京西宣撫使復兩浙園田募兩淮流民耕種癸
酉吳曦始自稱蜀王甲戌以鎮江副都統畢再遇為
鎮江都統權山東京東路招撫司公事乙亥四川宣
撫使程松遁

三年春正月丁丑朔丘璠罷己卯命知樞密院事張
巖督視江淮軍馬庚辰以陳自強兼樞密使癸未金
人破階州丁亥子圻生庚寅詔建康府給淮民裝錢
遣歸業辛卯吳曦招通判興元府權大安軍事楊震
仲震仲不屈死之癸巳命兩淮帥守監司招集流民
甲午吳曦僭位于興州甲辰奪池州都統陳孝慶三
官罷二月壬子以金師退御正殿復膳甲寅削奪福
建路總管兼延祥水軍統制商榮官爵柳州安置已
未罷程松四川宣撫使以成都府路安撫使楊輔為
四川制置使沿江制置使葉適兼江淮制置使庚申

以旱詔大理三衙臨安府決繫囚癸亥子圻薨追封
順王謚冲懷甲子振給旱傷州縣貧民命諸路提刑
司從宜斷疑獄丁卯罷江浙荆湖福建招軍戊辰子
塢生庚午金人去襄陽辛未以旱禱于天地宗廟社
稷命有司舉行寬恤之政八條蠲兩淮被兵諸州今
年租賦乙亥釋兩浙路杖以下囚四川宣撫副使司
隨軍轉運安丙及興州中軍正將李好義監四川總
領所興州合江倉楊巨源等共誅吳曦傳首詣行在
獻于廟社梟三日四川平併誅曦妻子家屬徙嶺南
奪其父挺官遷吳璘子孫出蜀存其廟祀玠子孫免

連坐三月丙子朔蠲兩淮被兵州郡役錢丁丑斬偽
四川都轉運使徐景望于利州壬辰興州將劉昌國
引兵至階州金人退去癸巳李好義復西和州丁酉
金人去成州庚子詔以楊輔為四川宣撫使安丙為
端明殿學士四川宣撫副使起居舍人許奕為四川
宣諭使落程松資政殿大學士奪六官筠州安置忠
義統領張翼復鳳州辛丑曲赦四川減雜犯死罪囚
釋杖以下壬寅責授程松順昌軍節度副使澧州安
置夏四月戊申以吳玠兼四川宣諭使子瑋薨追封
申王謚冲懿癸丑赦兩淮湖北北京西被兵諸州減雜

犯死罪囚釋流以下蠲湖北京西諸郡今年租賦四
川忠義人復大散關己未奉使金國通謝國信兩參
議官方信孺發行在庚申以兵部尚書宇文紹節知
江陵府權湖北京西宣撫使壬戌詔吳獵與宣撫司
議分興州都統司軍之半屯利州丁卯召楊輔詣行
在以吳獵為四川制置使戊辰以資政殿學士錢象
祖參知政事己巳改興州為沔州庚午贈楊震仲官
仍官其子一人癸酉金人復破大散關甲戌赦西和
階成鳳四州五月丁丑賞誅吳曦功戊寅用四川宣
撫司奏吳曦黨人張伸之等一十六人除名編配兩

廣及湖南諸州己丑以旱禱于天地宗廟社稷辛卯以太皇太后謝氏有疾赦是日崩四川宣撫副使司參贊軍事楊巨源與金人戰于長橋敗績戊戌詔四川宣撫置制司分治兵民庚子復置沔州副都統制以李好義為之辛丑李好義襲秦州敗還六月甲寅賞守襄陽功己未李好義遇毒死癸亥以林拱辰為金國通謝使遣富瑄使金告哀劉彌正賀金主辰癸酉安丙殺其參議官楊巨源秋七月己卯命不儔為嗣濮王乙酉以災傷下詔罪己八月己巳上太行太皇太后謚曰成肅皇后九月丁丑詔諸路帥臣申儆

邊備卒已召張巖詣行在壬午方信孺以忤韓侂冑
坐用私覲物擅作大臣饋遺金將奪三官臨江軍居
住甲申減極邊官吏舉主員乙酉權攢成肅皇后于
阜陵丙戌命淮西轉運司措置雄淮軍辛卯以趙淳
為殿前副都指揮使兼江淮制置使乙未張巖罷辛
丑遣王相持書赴金國都副元帥府壬寅祔成肅皇
后神主于太廟冬十月乙巳減臨安紹興二府囚罪
一等蠲民緣攢官役者賦丙午更殿前司純隊法乙
卯復珍州遵義軍丙辰詔以邊事諭軍民十一月甲
戌詔韓侂冑輕啓兵端罷平章軍國事陳自強阿附

充位罷右丞相乙亥禮部侍郎史彌遠等以密旨命
權主管殿前司公事夏震誅韓侂胄于玉津園以錢
象祖兼知樞密院事李壁兼同知樞密院事以誅韓
侂胄詔天下丁丑以夏震為福州觀察使主管殿前
司公事將士行賞有差奪陳自強三官永州居住戊
寅責授蘇師旦武泰軍節度副使韶州安置己卯斬
之詔姦臣竄跡當首開言路以來忠讜中外臣僚各
具所見以聞辛巳再奪鄧友龍五官南雄州安置尋
除名徙循州乙酉置御前忠銳軍丙戌以御史中丞
衛涇簽書樞密院事兼參知政事丁亥詔立皇子榮

王曦為皇太子更名憐戊子郭倪除名梅州安置郭
俱除名連州安置仍籍其家奪李壁二官撫州居住
癸巳奪張巖二官徽州居住己亥以立皇太子大赦
十二月癸卯以丘密為江淮制置大使罷山東京東
招撫司以許奕為金國通問使乙巳太白晝見丁未
罷京西北路招撫司己酉落葉適寶文閣待制蠲兩
淮州軍稅一年庚戌奪許及之二官泉州居住奪薛
叔似二官福州居住再奪皇甫斌五官英德府安置
癸丑金人復破隨州辛酉以錢象祖為右丞相兼樞
密使衛涇及給事中雷孝友並參知政事吏部尚書

林大中簽書樞密院事乙丑以禮部尚書史彌遠同
知樞密院事丙寅贈呂祖儉朝奉郎直祕閣官其子
一人丁卯詔改明年為嘉定元年是歲浙西旱蝗沿
江諸州水

本紀卷第三十八

本紀卷第三十九

宋史三十九

開府儀同三司上柱國錄軍國重事前中書右丞相監修國史領經筵事都總裁臣脫等奉

勅修

寧宗三

嘉定元年春正月戊寅右諫議大夫葉時等請集韓侂冑首于兩淮以謝天下不報辛巳下詔求言壬午王柟還自河南持金人牒求韓侂冑首丙戌葉時等復請梟侂冑首于兩淮戊子安定郡王伯羽薨壬辰以史彌遠知樞密院事以許奕爲金國通謝使二月戊申追復趙汝愚觀文殿大學士謚忠定詔史官改紹熙以來韓侂冑事迹壬子詔

臨安府振給流民戊午責授程松果州團練副使賓州安置是月郴州黑風峒寇羅世傳作亂招降之三月癸酉以毛自知首論用兵奪進士第一人恩例戊子下詔戒飭內外群臣復秦檜王爵贈謚己丑王桡自軍前再還行在議以韓侂冑首易淮陝侵地辛卯詔梟侂冑首于兩淮是春子埴生夏四月丙辰詔後省科別群臣奏疏可行者以聞贈彭龜年寶謨閣直學士落李洙寶文閣學士戊午再責授陳自强復州團練副使雷州安置仍籍其家閏月辛未置拘權安邊錢物所壬申雨雹癸未子埴薨追封肅王謚冲靖詔大理三衙臨安府及諸路闕兩州縣決繫囚釋

杖以下甲申詔自今視事令皇太子侍立乙酉以錢象祖
兼太子少傅衛涇雷孝友林大中並兼太子賓客辛卯以
旱禱于天地宗廟社稷癸巳減常膳乙未蠲兩浙關兩州
縣貧民逋賦命大理三衙臨安府兩浙州縣決繫囚丙申
幸太乙宮明慶寺禱雨丁酉以旱詔求言五月辛酉賜禮
部進士鄭自成以下四百二十有六人及第出身甲子太
白經天乙丑以飛蝗為災減常膳丁卯詔侍從臺諫疏奏
關政監司守令條上民間利害六月庚午金人歸大散關
辛未金人歸濠州乙亥衛涇罷丙子遣鄒應龍賀金主生
辰甲申林大中薨乙酉以蝗禱于天地社稷丙戌詔侍從

兩省臺諫舉沿邊守臣辛卯以史彌遠兼參知政事秋七月辛丑詔呂祖泰特補上州文學癸丑以丘富同知樞密院事壬戌以飛蝗為災詔三省疏奏寬恤未盡之事八月戊辰朔發米振貧民辛未丘富卒甲戌命侍從臺諫兩省詳議會子折閱利害辛巳以禮部尚書婁機同知樞密院事吏部尚書樓鑰簽書樞密院事丙戌詔禮部侍郎許奕起居舍人曾從龍攷訂監司守令所陳民間利害擇可行者以聞其未上者趣之甲午發米二十萬振糶江淮流民九月辛丑金使完顏侃喬宇入見壬子出安邊所錢一百萬緡命江淮制置大使司糴米振饑民己未詔以和議成

諭天下甲子遣曾從龍使金賀正旦乙丑大風赦沿邊諸
州冬十月丙子以錢象祖為左丞相史彌遠為右丞相雷
孝友知樞密院事仍兼參知政事婁機參知政事樓鑰同
知樞密院事己卯褒錄慶元上書楊宏中等六人庚辰封
伯祝為安定郡王辛巳蔡璉除名配贛州牢城癸未金遣
使來賀瑞慶節十一月丙辰金主璟殂戊午史彌遠以母
憂去位十二月戊辰錢象祖罷庚午四川初行當五大錢
升嘉興府為嘉興軍再奪李冰三官信州居住戊寅改命
曾從龍使金弔祭己卯黎州蠻畜卜寇邊己丑遣宇文紹
彭使金賀即位辛卯蠲兩淮州軍二稅一年是歲江淮制

置司汰雄淮軍歸農淮東揀刺八千餘人以補鎮江大軍
及武鋒軍之關淮西揀刺二萬六千餘人以爲御前定武
軍

二年春正月庚子詔内外有司䟽陳節用之事辛丑金遣
裴滿正來告哀壬巳以樓鑰參知政事御史中丞章良能
同知樞密院事吏部尚書宇文紹節簽書樞密院事庚申
金遣蒲察知剏來獻遺留物詔待從兩省臺諫各舉監司
郡守治行尤異者三三人二月巳巳金遣使來告即位庚
午黎州蠻寇邊壬午以會子折閱日甚詔待從兩省以下
各䟽奏所見丁亥罷法科試經義復六場舊法戊子大風

三月丙申雨雹已酉詔民以減會子之直籍沒家財者有
司立還之戊午禁兩淮官吏私買民田庚申命浙西及沿
江諸州給流民病者藥辛酉罷漳泉福三州興化軍賣廢
寺田壬戌出內庫錢十萬緡為臨安貧民棺槨夏四月
乙丑詔諸路監司督州縣捕蝗戊辰江淮制置司言放廬
濠二州忠義軍歸農甲申賜臨安諸軍死者棺錢戊子賜
楊震仲謚曰節毅五月丙申史彌遠起復丁酉以旱詔諸
路監司決繫囚効守令之貪殘者戊戌借補武訓郎羅日
原謀為變伏誅庚子詔侍從兩省臺諫各舉監司郡守有
政績才望者二人以補郎官之闕辛丑申命州縣捕蝗癸

卯詔兩淮荆襄守令以戶口多寡爲殿最乙卯釋大理三衙臨安府兩浙州縣杖以下囚除茶鹽賞錢已未以旱詔羣臣上封事庚申禱于天地宗廟社稷六月癸亥朔命浙西諸州諭民種麻豆毋督其租詔臺省及諸路監司速決滯獄戊辰奉安成肅皇后神御于景靈宮己巳遣俞應符賀金主生辰乙酉復禱雨于天地宗廟社稷己丑命江西福建二廣豐稔諸州糴運以給臨安仍償其費辛卯京湖制置司言放諸州新軍及忠義人歸農秋七月癸巳命有司舉行寬恤之政五條乙未詔荒歉州縣七歲以下男女聽異姓收養著爲令己亥蠲信陽荆門漢陽軍民賦壬寅

命兩淮轉運司給諸州民麥種癸卯募民以振饑免役八月甲子聽兩淮諸州民行鐵錢于沿江八州乙丑以安丙爲四川制置大使罷宣撫司甲戌冊皇太子丁丑皇太子謁于太廟戊寅詔皇太子更名詢己卯黎州蠻復寇邊丙戌發米十萬石振兩淮飢民九月己亥朝獻于景靈宮庚子朝饗于太廟辛丑合祭天地于明堂大赦丙午增太學內舍生十員癸丑命吏部郎官劉燾等審定中外所陳會子利害上于朝己未遣費培使金賀正旦冬十月丁卯命京湖制置司募逃卒及放散忠義以補廂禁軍闕丁丑金遣使來賀瑞慶節己丑命兩淮轉運司給諸州民稻種減

公私房廊白地錢什之三十一月辛卯朔沔州統制張林等謀作亂事覺貸死除名廣南羈管甲午詔浙西監司募飢民修水利乙未以歲饑罷雪宴是月郴州黑風峒寇李元礪作亂衆數萬連破吉郴諸縣詔遣荆鄂江池四州軍討之十二月甲子四川制置大使司調官軍討黎州蠻敗績己巳賜朱熹謚曰文乙亥詔諸州毋糴職田租丙戌金遣使來賀明年正旦是歲諸路旱蝗揚楚衡郴吉五州南安軍盜起

三年春正月甲辰下詔招諭群盜又詔戒飭監司郡守丙午雨土二月辛酉黎州蠻復寇邊庚午詔楚州武鋒軍歲

給累重錢如大軍例壬午以工部侍郎王居安知隆興府
督捕峒寇三月丁酉蠲都城及荒歉諸州民間逋負己亥
以湖南轉運判官曹彥約知潭州督捕峒寇庚子賜彭龜
年謚曰忠肅甲寅誅楚州渠賊胡海丙辰以久雨釋兩浙
州縣繫囚夏四月癸亥李元礪犯南雄州官軍大敗乙丑
決臨安繫囚釋杖以下丙寅詔監司守臣安集泰吉二州
民經賊蹂踐者戊辰出內庫錢二十三萬緡賜臨安軍民
己巳詔臨安府給細民病死者棺槨五月乙未淮東賊悉
平詔寬恤殘破州縣甲辰以去歲旱蝗百官應詔封事命
兩省擇可行者以聞乙巳命沿海諸州督捕海寇戊申經

理兩淮屯田庚戌以江陵忠勇軍爲御前忠勇軍癸丑以
久雨發米振貧民六月丁巳朔日有食之壬戌命有司舉
行寬恤之政十有九條癸亥遣黃中賀金主生辰己卯加
楊次山少保封永陽郡王詔三衙江上四川諸軍主帥核
實軍籍欺冒者以賊論是月池州副都統許俊江州副都
統劉元鼎與李元礪戰于江西皆不利知潭州曹彥約又
與賊戰亦爲所敗賊勢愈熾秋七月辛卯申嚴圍田增廣
之禁癸卯定南班爲三十員八月乙亥大風拔木是月臨
安府蝗九月丙戌朔詔三衙江上諸軍升差將校必以材
藝年勞其徇私者臺諫及制置總領劾之癸丑遣錢仲彪

使金賀正旦冬十月壬申雷金遣使來賀瑞慶節丁丑推
南雄州戰歿將士恩十一月癸巳賞楚州平賊功乙巳遣
朝臣二人往兩浙路與提舉官議收浮鹽是月李元礪迫
贛州南安軍詔以重賞募人討之十二月丙辰詔江淮諸
司嚴飭守令安集流民戊午婁機罷丙寅湖南賊羅世傳
縛李元礪以降峒寇悉平辛巳金遣使來賀明年正旦黎
州蠻請降是歲臨安紹興二府嚴衢二州大水振之仍蠲
其賦

四年春正月己丑叙州蠻攻嘉定府利店砦陷之甲辰以
四川鹽擔錢對減激賞綸一年丙午詔湖南江西諸州經

賊蹂踐者監司守臣攷縣令安集之實第其能否以聞二月乙卯李元礪伏誅壬戌羅世傳補官尋復叛辛巳罷廣西諸州牛稅閏月丁未大風辛亥詔諸路帥臣監司守令格朝廷振恤之令及盜發不即捕者重罪之三月己未臨安府振給病民死者賜棺錢丙子沔州將劉世雄等謀據仙人原作亂伏誅夏四月甲申禁兩浙福建州縣科折鹽酒己丑以吳曦沒官田租代輸關外四州旱傷秋稅丙午賜黑風峒名曰效忠戊申出內庫錢瘞疫死者貧民是月四川制置大使司置安邊司以經制蠻事命成都路提刑李臺潼川路安撫許奕共領之五月乙亥賜禮部進士趙

建大以下四百六十有五人及第出身六月丁亥遣余嶸
賀金主生辰會金國有難不至而還減京畿囚罪一等釋
杖以下辛丑更定四川諸軍軍額秋七月壬戌太白晝見
丙寅詔四川官吏嘗受僞命者自今毋得叙用丁丑詔軍
興以來爵賞冒濫者聽自陳除其罪九月辛酉叙州蠻寇
邊乙亥羅世傳爲其黨所殺丁丑遣程卓使金賀正旦詔
附會開邊得罪之人自今毋得叙用冬十月甲辰以金國
有難命江淮京湖四川制置司謹邊備十一月己酉朔日
有食之癸丑賞平峒寇功甲戌申嚴諸軍升差之制十二
月辛巳奉議郎張鉉坐扇搖國本除名象州羈管癸未以

會子折閱不行遣官體訪江浙諸州乙巳金遣使來賀明年正旦是歲金國有難賀生辰使不至

五年春正月己巳詔諸路通行兩浙倍役法著爲令壬申賜李好義謚曰忠壯二月壬午罷兩淮軍興以來借補官三月庚戌四川制置司遣兵分道討叙州蠻其酋米在請降戊辰以久雨詔大理三衙臨安府兩浙州縣決繫囚甲戌以廣東湖南京西盜平監司帥臣進職有差夏五月癸酉安南國王李龍翰卒以其子吳昌爲安南國王詔州縣見役人毋納免役錢役滿復輸六月癸未遣傳誠賀金主生辰乙酉禁銅錢過江秋七月庚申賞降叙州蠻功戊辰

以雷兩毀太廟屋避正殿減膳八月甲戌朔御後殿復膳
九月丙午太白晝見己酉有司上續編中興禮書庚戌遵
義砦夷楊煥來獻馬辛未罷沿海諸州海船錢遣應武使
金賀正旦冬十月辛巳詔諸路總領官歲舉堪將帥者二
三人安撫提刑舉可備將材者各二人戊子金遣使來賀
瑞慶節戊戌雷遣使弔祭安南十一月庚申朝獻于景靈
宮辛酉朝饗于太廟壬戌祀天地于園丘大赦十二月丁
丑再蠲濠州租稅一年壬午詔蠲州縣橫增稅額己亥金
遣使來賀明年正旦

六年春正月庚申宇文紹節卒詔侍從臺諫兩省官帥守

監司各舉實才二三人二月丁丑太白晝見丙戌有司上
嘉定編修吏部條法總類乙未詔宗室毋與胥吏通姻著
爲令三月癸亥樓鑰罷夏四月丙子以章良能參知政事
甲午復法科試經義法雜流進納人不預五月丁卯以旱
命大理三衙臨安府決繫囚戊辰修慶元六年以來寬恤
詔令六月乙亥詔刑部歲終上諸州未決之獄于尚書省
擇其最久者罪之丁丑遣董居誼賀金主生辰會金國亂
不至而還丁亥復監司臧否守令及監司郡守舉廉吏所
知法丙申詔三衙江上諸軍主帥各舉堪將帥者二三人
八月己巳朔詔諸路監司帥臣舉所部官吏之才行卓絕

績用章著者庚午知思州田宗範謀作亂夔州路安撫司遣兵討平之是月金人弑其主允濟九月甲辰蠲京湖諸州逋負二十八萬餘緡閏月戊辰朔詔御史臺置考課監司簿丙戌以金主新立命四川謹邊備己丑詔湖北監司守令振恤旱傷癸巳雷甲午史彌遠等上三祖下七世仙源類譜高宗寶訓皇帝玉牒會要乙未大雷丙申以雷發非時下罪己詔冬十月丁酉朔申嚴互送之禁戊申遣真德秀賀金主即位會金國亂不至而還庚戌遣李直使金賀正旦亦不至而還甲子金遣使來告即位十一月癸未虛恨蠻寇嘉定府之中鎮砦十二月壬寅蠲瓊州丁鹽錢

癸亥金遣使來賀明年正旦是歲兩浙諸州大水振之

七年春正月丁卯朔四川制置司遣提舉皂郊博馬務何九齡率諸將及金人戰于秦州城下敗還丁丑章良能薨壬午沔州都統王大才斬何九齡梟首境上以其事聞三月丁卯以安丙同知樞密院事成都府路安撫使董居誼爲四川制置使庚辰金國來督二年歲幣戊子金人來止賀正旦使夏四月癸卯蠲福建沿海諸州貧民納鹽五月丁丑太白經天乙酉賜禮部進士袁甫以下五百四人及第出身六月辛丑以旱命諸路州軍禱雨甲辰詔諸路監司守臣速決滯訟丙午蠲兩浙路諸州贓賞錢壬子釋大

理三衙及兩浙路杖以下囚丁已置嘉定府邊丁二千人
以備蠻秋七月甲子朔以左諫議大夫鄭昭先簽書樞密
院事兼權參知政事戊辰詔省吏毋授參議官乙亥金人
來告遷于南京庚寅以起居舍人真德秀奏罷金國歲幣
是月夏人以書來四川議夾攻金人不報八月癸巳朔罷
關外四州所增方田稅乙未罷四川宣制司所補官癸卯
復建宗學置博士諭各一人弟子負百人金國復來督歲
幣乙巳太白經天禁州縣沮壞義役戊申詔以安丙爲觀
文殿學士知潭州九月壬戌朔日有食之太白晝見乙丑
史彌遠等上高宗中興經武要略戊寅調殿前司兵增戍

天長縣丙戌以久雨釋大理三衙臨安府杖以下囚庚寅
釋兩浙路杖以下囚除茶鹽賞錢冬十月壬辰朔出內帑
錢振臨安府貧民十一月辛酉朔遣聶子述使金賀正旦
刑部侍郎劉鑰等及太學諸生上章言其不可不報丙戌
命浙東監司發常平米振災傷州縣罷四川制置大使司
所開鹽井十二月甲午復罷同安監鑄錢丁巳金遣使來
賀明年正旦是歲黎州蠻畜卜始降

八年春正月辛未命師禹嗣秀王詔侍從兩省臺諫各舉
將材三人己卯遣丁焞賀金主生辰戊子申嚴銷金鋪翠
之禁二月丙午雷孝友罷壬子蠲平江等五郡逋負米釋

其繫囚己未雨土三月辛酉詔大郡歲舉廉吏二人小郡
一人乙亥以旱命諸路州縣禱雨丙子蠲臨安府茶鹽賞
錢釋兩浙諸州繫囚辛巳應賢良方正能直言極諫科何
致坐妄造事端營惑衆聽配廣州牢城癸未安定郡王伯
祝薨丙戌釋江淮闕兩州郡杖以下囚夏四月乙未幸太
一宮明慶寺禱雨辛丑避正殿減膳壬寅禱雨于天地宗
廟社稷癸卯詔中外臣民直言時政得失乙巳減臨安及
諸路雜犯死罪以下囚釋杖以下五月辛未雨己卯命利
州路安撫司招刺忠義人辛巳御正殿復膳癸未復命有
司禱雨甲申詔賊吏毋得減年參選著爲令乙酉發米振

糴臨安府貧民六月丙辰詔兩浙江淮路諭民雜種粟麥
麻豆有司毋收其賦田主毋責其租秋七月辛酉以鄭昭
先參知政事禮部尚書曾從龍簽書樞密院事壬戌詔四
川立楊巨源廟名曰褒忠戊辰蠲兩淮諸州今年秋稅併
極邊五州明年夏稅癸酉蠲臨安紹興二府貧民夏稅丙
子發米三十萬石振糴江東飢民庚辰詔第摺更名思正
姪均更名貴和甲申詔職田蠲放如民田違者坐之八月
己丑賜張栻謚曰宣庚子申嚴宗子訓名法丁未權罷旱
傷州縣比較賞罰己酉禁州縣遏糴是月蘭州盜程彥暉
求內附四川制置使董居誼却之九月己巳朝獻于景靈

宮庚午朝饗于太廟辛未合祭天地于明堂大赦乙亥申
嚴兩浙圍田之禁甲申罷四川法科試冬十月乙未命六
部各類赦書寬恤事下諸路監司推行壬寅金遣使來賀
瑞慶節十一月丙辰朔封伯澤爲安定郡王癸亥遣施累
使金賀正旦十二月己丑詔楊巨源李好義子孫各進一
官辛亥金遣使來賀明年正旦是歲兩浙江東西路旱蝗
九年春正月乙丑賜呂祖謙謚曰成置馬軍司水軍乙亥
遣留筠賀金主生辰丙子命諸州招填軍籍辛巳罷諸路
旱蝗州縣和糴及四川關外科糴二月甲申朔日有食之
辛亥東西兩川地大震三月乙卯又震甲子又震馬湖夷

界山崩八十里江水不通丁卯又震壬申又震丁丑詔侍
從臺諫兩省舉堪監司者各二人夏四月戊戌秦州人唐
進與其徒何進等引衆十萬來歸四川制置使董居誼拒
却之五月癸酉太白晝見六月辛卯西川地震壬辰又震
乙未又震黎州山崩戊申振恤浙西被水州縣寬其租稅
秋七月戊辰詔邊縣擇才不拘常法其餘並遵三年之制
九月甲申詔兩浙江東監司覈州縣被水最甚者蠲其租
冬十月癸亥西川地震甲子又震丙寅金遣使來賀瑞慶
節十一月庚寅遣陳伯震使金賀正旦癸卯以程彥暉攻
圍鞏州迫及川界命利州副都統劉昌祖移駐西和州以

備之十二月丁巳再給諸軍雪寒錢乙亥金遣使來賀
明年正旦

本紀卷第三十九

本紀卷第四十

宋史四十

開府儀同三司上柱國錄軍國重事兼中書右丞相鑒修國史領經筵事都總裁臣脫脫等奉
敕修

寧宗四

十年春正月癸巳雨土乙未大風庚子遣錢撫賀金主生
辰二月庚申地震夏四月丁未朔金人犯光州中渡鎮執
權場官盛允升殺之遂分兵犯樊城戊申鄂州江陵府副
都統王守中引兵拒之金人遂分兵圍棗陽光化軍丙辰
詔江淮制置使李珣京湖制置使趙方措置調遣仍聽便
宜行事丁巳命四川制置使董居誼酌量緩急便宜行事

辛酉廬州鈴轄王辛敗金人于光山縣之安昌砦殺其統
軍完顏掩壬戌金兵遁去徐州光化皆以捷聞丁卯詔出
戍官兵全給其家五月辛巳以久雨釋大理三衙臨安府
杖以下囚蠲茶鹽賞錢甲申賜禮部進士吳潛以下五百
二十有三人及第出身癸卯趙方請下詔伐金遂傳檄招
諭中原官吏軍民六月庚戌太白晝見戊午詔厲將士募
京西忠義人進討辛未東川大水癸酉太白經天秋七月
丙子朔日有食之戊寅以旱釋諸路杖以下囚甲申雅州
蠻寇邊焚碣門砦遣兵討之丁亥嗣濮王不儔薨庚子詔
諸軍將佐有罪者迭屯駐州鞠之罷軍士淫刑八月乙丑

詔監司郡守各舉威勇才略可將帥者二人冬十月乙巳朔以久雨釋大理三衙臨安府及兩浙諸州杖以下囚癸酉蠲三衙江上諸軍公私逋負錢十一月丁丑大風庚辰太白晝見甲申詔浙東提舉司發米十萬石振給貧民戊戌太白經天十二月戊申以軍興募民納粟補官乙卯詔武舉人毋復應文舉癸亥金鳳翔副統軍完顏贊以步騎萬人犯四川戊辰迫湫池堡己巳破天水軍守臣黃炎孫遁金人攻白環堡破之庚午迫黃牛堡統制劉雄棄大散關遁金人據之

十一年春正月壬午京東路忠義李全率衆來歸詔以全

爲京東路總管戊子金人圍皂郊堡壬辰利州將麻仲率忠義人焚秦州永寧砦乙未以度僧牒千給四川軍費丁酉詔四川忠義人立功賞視官軍金人犯隔芽關興元都統李貴遁官軍大潰二月甲辰金人焚大散關而去乙巳沔州都統王大才馬蹶死于河池丙午金人破皂郊死者五萬人丁未金人破湫池堡戊申金人圍隨州棗陽軍游騎至漢上均州守臣應謙之棄城走丙辰白虹貫日楚州鈐轄梁昭祖焚金人糧舟于大清河京東忠義副都統沈鐸遣兵助之三月丁丑金人焚湫池堡而去戊子利州統制王逸等率忠義人復皂郊金副統軍完顏贊包長壽遁

去沔州軍士郭雄追斬贊首長壽僅以身免己丑沔州都
統劉昌祖至皂郊辛卯忠義人十萬餘出攻秦州官軍繼
進至赤谷口王逸傳昌祖之命退師且放散忠義人軍大
潰癸巳包長壽合長安鳳翔之衆復攻皂郊遂趨西和州
是日鎮江忠義統制彭惟誠等敗于泗州丙申劉昌祖焚
西和州遁守臣楊克家棄城去戊戌金人破西和州夏四
月甲辰劉昌祖焚成州遁守臣羅仲甲棄城去是日金人
去西和州戊申命四川增印錢引五百萬以給軍費階州
守臣侯頤棄城去是日金人去成州戊午金人復犯大散
關守將王立遁己未金人犯黃牛堡興元都統吳政拒退

之癸亥政至大散關執王立斬之五月乙亥命四川制置
司招集忠義人癸未蚩尤旗見其長竟天丁亥詔侍從臺
諫兩省官集議平戎禦戎和戎三策壬辰申嚴試法官七
等之制六月辛酉詔湖州振恤被水貧民秋七月癸酉奪
知天水軍黃炎孫三官辰州居住乙酉修孝宗寶訓辛卯
蠲四川關外諸州稅役甲午蠲光州民兵戰死之家稅役
九月己卯朝獻于景靈宮庚辰朝饗于太廟辛巳合祭天
地于明堂大赦辛卯安定郡王伯澤薨丙申興元都統吳
政利州副都統張威各進三官劉昌祖奪五官韶州安置
冬十月丙午羅仲甲楊克家侯頤並奪三官仲甲常德府

克家道州順撫州居住戊午大風壬戌修盱眙軍城十一月壬申金人攻安豐軍之黃口灘是月陝西人張羽來歸十二年春正月戊辰朔召董居誼詣行在以新利州路安撫使聶子述爲四川制置使庚辰金人犯湫池堡守將石宣拒退之甲申金人攻白環堡守將董炤拒退之戊子金人犯成州沔州都統張威自西和州退守仙人原庚寅金人犯隨州棗陽軍又破信陽軍之二砦京西諸將引兵拒之辛卯金人犯西和州守臣趙彥呐設伏以待之殲其衆乃還金人犯安豐軍建康都統許俊遣將却之金人焚成州犯河池守將張斌遁去癸巳金人圍安豐軍及光州攻

光化軍破鄖山縣進逼均州甲午破鳳州守臣雷雲棄城去金人夷其城乙未興元都統吳政及金人戰于黃牛堡死之金人乘勝攻武休關二月戊戌朔金人破光山縣太白晝見壬寅金人圍棗陽軍京湖制置使趙方遣統制扈再興救之不克進而還癸卯金人破武休關興元都統李貴遁還利州路提刑權興元府事趙希昔棄城去丁未金人破興元府戊申金人攻棗陽軍己酉遣殿前司軍八千人防捍江面庚戌以曾從龍同知樞密院事兼江淮宣撫使權吏部尚書任希夷簽書樞密院事辛亥金人破大安軍守臣李文子棄城去金人犯洋州守臣蔡晉卿遣兵拒

之不克洋州破壬子四川制置使董居誼自利州遁沔州
都統張威遣統制石宣等邀擊金人于大安軍大破之獲
其將巴士魯安金人遂去興元府丙辰金人去洋州丁巳
京湖制置使趙方遣統制扈再興等引兵三萬餘人出攻
唐鄧二州隨州忠義統領劉世興等引兵攻唐州甲子金
人去棗陽軍乙丑夏人復以書來四川議夾攻金人利州
路安撫丁焞許之三月己巳以鄭昭先知樞密院事曾從
龍參知政事癸酉金人復入洋州焚其城而去乙亥興元
軍士權興等作亂犯巴州守臣秦季標棄城去鄂州統制
劉世榮會兵攻唐州丁亥太白晝見權興等降癸巳雨土

甲午金人自盱眙退師閏月己未追雷雲三官梅州安置
辛酉贈吳政爲右武大夫忠州刺史壬戌詔撫諭四川官
軍忠義人癸亥興元軍士張福莫簡等作亂以紅巾爲號
是春金人圍安豐軍滁濠光三州江淮制置使李珣命池
州都統武師道忠義軍統制陳孝忠救之皆不克進金人
遂分兵自光州犯黃州之麻城自濠州犯和州之石碭自
盱眙軍犯滁州之全椒來安及揚州之天長眞州之六合
淮南流民渡江避亂諸城悉閉金人游騎數百至東采石
楊林渡建康大震京東總管李全自楚州忠義總轄李先
自漣水軍各引兵來援金人乃解去全追擊敗之于曹家

莊獲其貴將夏四月庚午張福入利州四川制置使聶子述遁殺總領財賦楊九鼎丁丑張福掠閬州丁亥掠果州癸巳曾從龍罷以鄭昭先兼參知政事崇信軍節度使開府儀同三司萬壽觀使安丙爲四川宣撫使董居誼落職奪三官五月乙未朔召聶子述詣行在張福薄遂寧府潼川府路轉運判官權府事程遇孫棄城遁丁酉減兩淮荆襄湖北利州路沿邊諸州雜犯死罪囚釋流以下仍蠲今年租稅己亥太學生何處恬等伏闕上書以工部尚書胡榘欲和金人請誅之以謝天下張福入遂寧府焚其城甲寅四川宣撫司命沔州都統張威引兵捕福戊午福入普

州守臣張已之棄城遁癸亥詔侍從兩省臺諫各舉文武
可用之才二三人六月戊辰張福屯普州之茗山庚午張
威引兵至丙子太白晝見辛巳西川地震太白晝見癸未
張福請降乙酉張威執之歸于宣撫司丁亥嗣濮王不嫖
薨金國招諭李全等不聽辛卯太白經天癸巳丁熒復以
書約夏國攻金人秋七月丙申張福伏誅復奪董居誼二
官永州居住庚子張威捕賊衆一千三百餘人誅之莫簡
自殺紅巾賊悉平癸亥李全引兵至齊州知州王贊以城
降八月戊辰復合利州東西路爲一九月丙午罷江淮制
置司置沿江淮東西制置司以寶文閣待制李大東爲沿

江淮東西制置司以寶文閣待制李大東爲沿江制置使
淮南轉運判官趙善湘爲主管淮西制置司公事淮東提
刑賈涉爲主管淮東制置司公事兼節制京東河北路軍
馬十一月辛亥進封楊次山爲會稽郡王十二月壬申京
東節制司言復京東河北二府九州四十縣乙亥築興元
府城丁丑雅州蠻入廬山縣己卯四川宣撫司遣兵取洮
州召諸將議出師招諭中原豪傑辛巳蠻焚碣門砦邊丁
大敗乙酉金人犯鳳州之長橋丁亥四川宣撫司命罷洮
州之師己丑京湖制置司遣統制扈再興等引兵六萬人
分三道出境庚寅賞茗山捕賊功

十三年春正月丁酉扈再興引兵攻鄧州鄂州都統許國
 攻唐州不克而還金人追之遂攻樊城趙方督諸將拒退
 之己亥雅州蠻復掠廬山縣遣兵討之己酉命不凌為嗣
 濮王戊午夏人復以書來四川議夾攻金人三月辛卯朔
 兩土丁已黎州土丁叛遣兵討之夏四月庚申朔淮東制
 置賈涉招諭山東兩河豪傑五月庚寅朔雅州蠻降戊戌
 史彌遠等上玉牒及三祖下第七世宗潘慶系錄六月癸
 酉賜禮部進士劉渭以下四百七十有五人及第出身加
 安丙少保丙子以李全為左武衛大將軍壬午以季先為
 果州團練使漣水軍忠義副都統命赴樞密院議事未至

殺之秋七月戊戌以京東河北諸州守臣空名官告付京東河北節制司以待豪傑之來歸者丙午以任希夷兼參知政事丙辰四川宣撫司招黎人土丁降之八月癸亥皇太子詢薨謚曰景獻壬申安丙遣夏人書定議夾攻金人癸未四川宣撫司命利州統制王仕信引兵赴熙鞏州會夏人遂傳檄招諭陝西五路官吏軍民甲申復海州以將作監丞徐晞稷知州事盱眙將石珪叛入漣水軍詔以珪為漣水忠義軍統轄九月辛卯夏人引兵圍鞏州且來趣師甲午太白晝見王仕信引兵發宕昌乙未四川宣撫司統制質俊季寔引兵發下城戊戌四川宣撫司命諸將分

道進兵沔州都統張威出天水利州副都統程信出長道
興元副都統陳立出大散關興元統制田胃為宣撫司帳
前都統出于午谷金州副都統陳昱出上津巳亥張威下
令所部諸將毋得擅進兵庚子質俊等克來遠鎮辛丑王
仕信克鹽川鎮壬寅質俊等自來遠鎮進攻定邊城金人
來救俊等擊破之乙巳程信王仕信引兵與夏人會于鞏
州城下丁未攻城不克庚戌金人犯皂郊堡沔州統制董
炤等與戰大敗壬子程信及夏人攻鞏州不克信引兵趨
秦州丙辰夏人自安遠砦退師冬十月丁巳朔程信邀夏
人共攻秦州夏人不從信遂自伏羌城引軍還諸將皆罷

兵戎寅程信以四川宣撫司之命斬王仕信于西和州四
川宣撫司以張威不進兵罷其軍職十一月庚戌大風壬
子臨安府火十二月戊午大風壬申漣水忠義軍統轄石
珪叛癸未鎮江副都統程朝宗以皇帝恭膺天命之寶來
獻

十四年春正月丙戌朔以雪寒釋大理三衙臨安兩浙諸
州杖以下囚乙未地震以李全還自山東賜緡錢六萬庚
子立四川運米賞格二月戊辰金人圍光州己巳金人犯
五關壬申金人治舟于團風弗克濟遂圍黃州分兵破諸
縣又遣別將犯漢陽軍丁丑李全棄泗州遁還甲申詔淮

東京湖諸路應援淮西沿江制置司防守江面權殿前司
職事馮榘將兵駐鄂州京東忠義都統李全將兵救蘄黃
榘不果行三月丙戌朔鄂州副都統扈再興引兵攻唐州
丁亥金人破黃州淮西提刑知州事何大節棄城遁死庚
寅長星見李全自楚州引兵援淮西癸巳扈再興引所部
趨蘄州甲午太白晝見乙未詔京湖制置司趣援蘄黃已
亥金人陷蘄州知州事李誠之及其家人官屬皆死之癸
丑金人退師扈再興邀擊敗之于天長鎮甲寅晦又敗之
夏四月乙卯復置諸王官大小學教授乙丑命任子簾試
于御史臺戊辰金人渡淮而北李全遣兵追擊敗之五月

甲申朔日有食之壬辰史彌遠等上孝宗寶訓皇帝會要
丙申西川地震乙巳頒慶元寬恤詔令六月甲寅朔初置
沿江制置副使司于鄂州丙寅詔以姪福州觀察使貴和
為皇子更名竑進封祁國公丁卯以立皇子告于天地宗
廟社稷乙亥以太祖十世孫與莒補秉義郎丙子減京畿
囚罪一等釋杖以下辛巳大風秋七月辛丑以趙方為京
湖制置大使賈涉為淮東制置使兼京東河北路節制使
丁未修光宗寶訓八月乙卯賜史彌遠家廟任希夷罷壬
戌以兵部尚書宣繒同知樞密院事給事中俞應符簽書
樞密院事申子以秉義郎與莒為右監門衛大將軍賜名

貴誠乙丑追封史浩為越王改謚忠定配享孝宗廟庭戊寅以姪右監門衛大將軍貴誠為果州團練使九月癸未立貴誠為沂靖惠王後己丑朝獻于景靈宮庚寅朝饗于太廟辛卯合祭天地于明堂大赦冬十月癸丑京東河北節制司言復滄州詔以趙澤為河北東路鈐轄知州事甲寅復以齊州為濟南府兗州為襲慶府丙寅夏人復以書來四川趣會兵庚午雷十一月己亥安丙薨是月京東安撫張林叛十二月庚申鄭昭先罷閏月辛巳朔以宣繪兼參知政事俞應符兼樞參知政事戊申以殿前司同正將華岳等謀為變殺之是歲浙東江西福建諸路旱沴成階

利四州水振之

十五年春正月庚戌朔御大慶殿受恭膺天命之寶癸丑
立李誠之廟于蘄州甲寅褒贈蘄州死事官吏錄其子孫
有差丁巳詔撫諭山東河北軍民將帥官吏已未以受寶
大赦文武官各進秩一級大犒諸軍二月庚子罷御史臺
簾試任子法三月丁巳詔江西提舉司振恤旱傷州縣夏
四月壬午詔蠲蘄州今年租賦五月庚戌太白晝見甲寅
詔監司慮囚察州縣匿囚者劾之丁巳進封子祁國公竑
為濟國公己未以姪果州團練使貴誠為邵州防禦使壬
戌知濟南府种贇等攻張林于青州林遁去己巳修孝宗

經武要略六月辛卯俞應符薨秋七月甲子詔江淮荆襄
四川制置監司條畫營田來上八月己卯命戶部詳議義
役辛卯詔文武官毋得歸宗著為令甲午有彗星出于辰
九月辛亥以宣繒參知政事給事中程卓同知樞密院事
吏部尚書薛極賜出身簽書樞密院事癸丑雷大雨雹丁
巳復以隨州三關隸德安府置關使壬戌彗星沒辛未太
白晝見冬十月丙子以收復京東州軍犒賞忠義有差十
一月戊午赦京東河北路十二月乙亥朔發米振給臨安
府貧民丙子以雪寒釋京畿及兩浙諸州杖以下囚丁亥
以李全為保寧軍節度使右金吾衛上將軍京東路鎮撫

副使

十六年春正月戊申詔命官犯贓毋免約法己酉子坻生
辛酉命淮東制置司振給山東流民二月戊子兩土己丑
嗣秀王師禹薨追封和王戊戌子坻薨追封邳王謚冲美
三月戊申張林所部邢德來歸詔進二官復以為京東東
路副總管丁卯以道州民饑詔發米振之夏五月甲辰詔
右選試注官如左選之制戊申賜禮部進士蔣重珍以下
五百四十有九人及第出身戊辰詔復潭州稅酒法六月
丁酉程卓薨秋八月辛巳詔州縣經界毋增紹興稅額癸
未申嚴船舶銅錢之禁九月庚子朔日有食之乙巳詔江

淮諸司振恤被水貧民乙卯雷冬十一月辛亥以太平州大水詔振恤之十二月辛巳命淮東西總領及沿江被水州募江西湖南民入米補官癸未嗣濮王不凌薨壬辰雷十七年春正月戊戌朔詔補先聖裔孔元用爲通直郎錄程順後癸亥命淮東西湖北路轉運司提督營屯田二月癸巳蠲台州逋賦十萬餘緡甲午命臨安府振糶貧民三月癸丑雪是月金人迫西和州尋引兵還夏四月辛卯詔廬州振糶饑民乙未賜李全彭義斌錢三十萬緡爲犒賞戰士費五月戊戌詔覈實兩淮京湖四川江上諸軍之數六月丁卯朔太白經天晝見癸酉知和州尚震午坐金兵

至謀道奪三官岳州居住壬辰大名府蘇椿等舉城來歸
詔悉補官即以其州授之秋七月丁酉朔命福建路監司
振恤被水貧民辛亥命師岳嗣秀王八月乙亥罷通州天
賜鹽場丙戌帝不豫閏八月乙未朔申嚴兩浙諸州輸苗
過取之禁丁酉皇帝崩于福寧殿年五十七史彌遠傳遺
詔立姪貴誠爲皇子更名昀即皇帝位尊皇后爲皇太后
垂簾聽政進封皇太子竑爲濟陽郡王出居湖州寶慶元年
正月己丑謚曰仁文哲武恭孝皇帝廟號寧宗三月癸酉
葬于會稽之永茂陵三年九月加謚法天備道純德茂功
仁文哲武聖睿恭孝皇帝

贊曰宋世內禪者四寧宗之禪獨當事勢之難能不失禮節焉斯可謂善處矣初年以舊學輔導之功召用宿儒引拔善類一時守文繼體之政煒然可觀中更侂冑用事內蓄群姦至指正人為邪正學為偽外挑強鄰流毒淮甸頻歲兵敗乃函侂冑之首行成于金國體虧矣既而彌遠擅權幸帝耄荒竊弄威福至於皇諸國統乘機伺間亦得遂其廢立之私他可知也雖然宋東都至于仁宗四傳而享國百年邵雍稱為前代所無南渡至寧宗亦四傳而享國九十有八年是亦豈偶然哉惜乎神器授受之際寧理之視仁英其跡雖同其情相去遠矣

本紀卷第四十